


彙纂功過格

吳建勳
敬題



8J
1548
H85
1879
V.2

彙纂功過格第二卷

妻妾

盡倫之四總論

訓婦女者。首曰必敬必戒。無

違夫子。故感應篇特垂女不柔順。不敬其夫之敝。要其所以不敬順者。雖女子質性之劣。亦由男子有以養成之。語云。教婦初來。教子幼孩。凡爲丈夫者。須先事事諭之以理。不可溺於牀第之愛。尤不可輕信其言。禮義與情愛兼至。加以躬行化導。雖極頑劣者。久之德性自純。若其始不慎。方正一失。其終必倍費力矣。

一功

隨事以禮義化誘。使克全婦德。

一事一功。

徵事漢

張湛矜嚴好禮。居

處必自修整。每遇妻子。必講說禮訓。及前言往行。以教誨之。相對若君臣。故其妻子亦交相勉飾。有聲鄉

黨光武朝拜

太子太傅

十功 嫡庶正體統。

五十功 勸化孝公姑和妯娌。

增註

此已在上條隨事化

大端故復揭出。

徵事

文安縣民娶婦美而悍於事姑

夫歸必泣訴姑凌虐之苦夫漫置不聞一夕恨怒不

已夫出利刃示婦詭云汝每訴姑暴虐行此何如婦

默不荅夫曰汝且謹事一月令四鄰知汝勤姑虐然

後密行婦如言幾一月矣復乘醉取刀玩於燈下呼

婦曰姑日來視汝若何婦曰非前比也又一月復扣

刀問之婦曰姑今日與我甚好前日事慎勿作夫握

刀怒視之因大慟曰人生父母之恩殺身莫報娶婦

正爲奉舅姑長子息耳。我每察汝不能承順我母，乃反令我爲大逆。我造此刀，實欲斷汝首，以快吾母之心。姑待汝兩月，使汝改過承顏，盡爲婦之道，表吾母待汝之心。知曲不在母而安受我刃也。婦戰懼泣拜曰：「幸恕我死當畢。此生承順，不敢少懈。久之乃許其後。婦姑交睦，播於鄉黨。夫人情之變，莫甚此婦姑之間也。爲姑者至於令人欲殺而甘心，則平日之暴虐爲何如？爲婦者至於殺其姑而罔恤，則稟質之殘忍爲何如？爲男子者處其間，不大難爲情乎？乃以術處之，令婦耐情以承順，而姑遂變其暴虐之習，則天下無不變子之父母，可知矣。姑變其暴虐之習，而婦亦遂樂事其姑，則天下無不愛親之人，子可知矣。人性本善，往往以氣質縱任，遂致失其本。然如此姑婦之間，不幾各淪於大惡乎？一轉而各爲大善，聖賢垂訓

首重忍字。古來咸以此爲處家庭要訣。上下之間。貴乎各盡。而不能忍耐之惡。則尤嚴於在下者。敢以此事告天下之婦女。尤欲以此事告天下之化婦女者。◎夫婦相敬如賓。無一間。

言無一失體。

經一年爲五十功。發明無失體。自我爲之。無間言。必化導之使然。非積德累仁。

無少愧於妻子者。其能之乎。徵事孟子既娶。將入室。見婦袒而居。不悅。欲去之。母召而責之曰。禮將入門。問孰存。所以廣敬也。將上堂。聲必揚。所以警衆也。將入戶。視必下。恐見人之過也。今子不察於禮。而責禮於人。不已遠乎。嗟乎。如孟母之教。則無失體固已。抑尤可以無間言。其所謂持之以莊而又待之以恕者。歟。佩斯訓也。於斯條何有。

百功富貴娶原聘殘疾女。

徵事

鄭叔通幼時父母聘夏氏女爲婚及長登第而女病

啞其伯叔欲別擇叔通堅不可曰此女某不娶將何所歸且先人有約豈可違背以傷倫理若無恙而完婚因疾而遂棄豈人情乎遂娶之叔通官至朝奉大夫夏氏生子亦貴顯○河南襄城縣靳尚書夫人村家女也幼時許婚後女喪明適公年十八入泮名聲鵲起村家自揣非配懇媒求絕父母許之公獨不允諫曰婚姻事出天定因失明而我棄之誰與婚者背盟失信我不爲也逾年公聯捷官至一品夫人目復明噫奇矣哉**附錄**吳次魯年五十餘僅一子國彥已受室顧自念孱弱欲其父更舉子以爲宗祧計請於母母語次魯次魯曰貧家有子足矣安用多爲母子乃私罄衣飾餘贏置一妾比入門羸然病婦遂延醫

治之。病氣已劇。僉云不治。但亟賣。猶可得值。母子淡
自悔責。令原媒改遣。議已成。次魯知之。曰。我既爲人。
誤。安可復誤他人。且此妾在我家。猶可望生。一出我
門。萬無生理。所得不過十金。安忍棄之。竟留其妾。具
實以告買者。還其直而去。妾自是病日愈。◎不幸喪
平復如舊。旋舉一子。里閭咸謂陰德之報。

賢耦既已有子終身不忍再娶

徵事曾子喪妻終身
不娶。子元請焉。曾子

曰。高宗以後妻殺孝已。尹吉甫以後妻殺伯奇。吾上
不及高宗。中不比吉甫。庸知其得免於非乎。漢王吉
之子駿爲少府。喪妻不復娶。或問之。駿曰。德非曾參。
子非曾元。亦何敢娶。魏管甯妻卒。親故勸其再娶。甯
曰。每省曾子王駿之言。意常嘉之。豈違本心哉。愚按。
力能再娶。不忍爲之。抑常情以從天理。非賢者不能。

為疑百功不足盡之也

百過身為不可訓之事。致妻妾無所敬畏。夫綱不行。**明發**

與善堂格云。夫綱振立。刑于有道。使室人凡事敬順。註謂情欲之感。無介乎儀容宴私之意。不形于動靜。則刑于不難矣。語云。妻妾乃屋漏之史。官慎之哉。**附錄**于靜之曰。人但知口中有劍。不知枕裏藏刀。牀蓐間謔浪不根之語。一入婦人之耳。彼執為終身槩柄。欺壓凌制。有所由來。乃知閨闈中自有畏途。禍門不第在外人。齒頰也。**容任不孝公姑**。他人不忍容任。况其為已身父母乎。感應篇曰。失禮於舅姑。謂細微節目處也。為夫者容任其婦。理或有之。此云不孝。大約指失

禮言。如失敬失養。出言不婉等類。蓋不可謂非不孝也。○施愚山曰。貧家甘旨難得。每私啖其兒女。不奉舅姑。或姑媳同操井臼。起坐授受。等於妯娌。無尊卑禮。至於富貴之家。奉事舅姑。止驅婢僕。晏起晝眠。一切飲食。不親調饌。視其舅姑如過客。此皆謂之失禮。出於禮。則入於刑矣。况忤逆悍悖。有不立受天誅者乎。此惟在男子躬行化導。失禮微愆。實男子之過。而不可專責婦人也。**徵事**唐李迥秀母少賤。妻嘗詈媵婢。母聞不悅。迥秀卽時出之。或問何遽如此。荅曰。娶婦欲事姑耳。今乃違忤顏色。安敢留也。所居堂產芝草。犬乳鄰猫。中宗以爲孝感。旌表門閭。嗟乎。人誠知娶婦所以事姑。亦何至於任其不孝也。○張汝明人太學司業黃隱欲以女妻之。再四辭。問之曰。家世貧。難以承公美意。黃曰。吾豈以貧富爲嫌。張曰。公卽諒

其貧不以禮責。顧居家常計。不可不早策於心。黃曰。吾亦籌之矣。并可。不貽汝內顧之憂。張謝曰。誠荷公德。雖然。娶妻以養親也。公女。生長富貴。萬一不善。順承。無以得親心。實某所難處。以是輾轉籌度。不敢仰承。隱嗟嘆。敕其女。必修婦道。然後受。

○閨範不謹

附錄

沈龍江先生論

女子出。擁蔽其面。已嫁而反。則兄弟勿與同席而坐。同器而食。而叔嫂不通問。其嚴若此。昔魯敬姜年老矣。而季康子其姪孫也。相見與言。皆不踰閭。君子曰。知禮。今人家婦女。有託在肺腑至親。而男婦同席。笑語一堂者。俱非美俗。閑家者宜以是爲切戒。○孝經有閨門章。子曰。閨門之內。具禮矣乎。方宏靜曰。居室必辨內外。須門內不聞嘻笑聲。男女左右。豈惟道路當然。蓬華之間。容膝之室。此禮烏可紊也。○富

貴後耽溺私寵忘糟糠妻。

徵事

杭人鄭和性淫初甚

愛妻後娶美妾遂棄其妻

妻鬱病而死竟不一顧和亦尋死同邑有女沈翠英
赴陰復甦見和在轉輪司身無寸衣受箠割苦牌上
寫鄭和多淫嫌妻戀妾地獄罪滿押赴徽州陸家作
母毆○裴章河東人父裴胄曾鎮荆門軍僧曇照道
行甚高能知休咎章幼時爲曇照所重言其官班位
望過於其父弱冠父爲娶李氏女章從職太原棄其
妻於洛中過門不入別有所挈李氏自感薄命常褐
衣髻髻讀佛書蔬食又十年曇照至太原章從曇照
叙舊照驚吁久之謂曰貧道數十年前嘗語郎君必
貴今削盡何也章自以薄妻之事啓之照曰夫人生
魂訴上帝以罪處君奈何後數日爲其下以刀割腹
於浴斛五臟墮地遂死○顏光衷曰人生莫作婦人

身。百般苦樂由他人。彼其離親別愛。生死隨人所主。惟一夫耳。饑不獨食。寒不獨衣。舍其身而身。我舍其父母。而父母。我一遇遠旅之商。遊學之士。孤房獨宿。寒夜鐵衾。豈易受哉。我則薄倖。委身外舍。鍾情花柳。儻弄如狂。而或一旦知遇。姬侍滿前。罔念結髮。恐懼與汝。安樂棄余。吁嗟。何待人以不恕也。○唐太宗欲以女妻尉遲敬德。敬德曰。臣妻雖陋。祖與其貧賤久矣。臣雖不學。聞古人富不易妻。此非臣之所願也。上乃止。○張文節夫人聖節入朝。莊獻太后見其二婢陋甚。因命夫人爲別置少者。夫人如戒。文節旣見。指二老婢曰。此皆久在左右。若逐出之。則無所歸矣。如二姝者。今皆未笄。嫁與少年。前程未可量。若使守一老翁。何益於事。卽日嫁之。夫妾婢間。且不肯以新舊易心。何況結髮婦也。盛德之與薄情。真霄淵之別矣。

增註按功過格於此條。只舉過不記功。意以不忘糟糠固情之大常也。然豈無迫於勢而不自持者。於此能守正不移。則其功非小矣。應准朋友條不負一素交同論。

五十過

縱妾婢抗正室。◎縱正室不仁愛前妻子女。

增註

此條與上一條。蓋指可恕者言。不指凌虐也。世安有縱妾婢凌虐正室之人。卽有其人。亦不得以人目之矣。功過格安所庸其責備歟。若夫繼室之凌虐前妻子女。爲之夫者。睚情而受制焉。因以縱其肆惡。而付之無可如何。世如此者。蓋不少也。格中似宜於此剖明各異。白文闕如。旁註復畧。愚意當准末條縱虐婢妾。與自爲者同論。雖然。格之誠論。則旣詳矣。曰不留意勸化。曰聞言不察。曰受制於內。曰不正言禁阻。誠

一一。凜守其言。則容任殘虐子女。必無是過矣。亦何妨於闕之也哉。

◎嫌妻色醜不睦。

未嘗有過。薄情不睦者同。

徵事

劉庭式本田家鄰翁。

有女。約與爲婚。契濶數年。登第歸。翁已死。女復雙瞽。家極困窮。庭式使人申前好。女家堅辭。庭式曰。與翁有約。豈可以翁死。女疾而背之乎。卒娶之。閨門雍睦。生二子。及卒。哭之慟。踰年而哀不衰。遂不復娶。蘇軾時爲州守。問曰。哀生於愛。愛生於色。足下哀何從生乎。庭式曰。吾知喪。吾妻而已。吾若緣色而生愛。緣愛而生哀。色衰愛弛。吾哀亦忘。則凡揚袂倚市。日招而心挑者。皆可以爲妻耶。軾深感其言。後二子皆登第。嫌妻色醜者。盍鑒焉。又閩士李元應試道過衢州。店主夢神語曰。明日來一秀才。乃科甲中人。宜善待之。及至。主人款待甚優。且告以夢。李甚喜。夜思妻貌陋。

甚作夫人適增醜。若何得一美者。既去。主人復夢神曰。此生功名未遂。便思棄妻。三尸神已錄其過。上奏天曹。名不成矣。生下第而歸。主人又以夢告之。驚愧而去。大易妻之罪。自有王法。人或不敢。棄妻之念。未識陰條。人恒有之。一舉念間。即遭天譴。則凡顯著其薄情者。似宜不止於五十過也。◎不敬愛

正室父母兄弟

薄待妾婢父母者。減半論。

增註

愚釋

苟其意念漠然。有文無實。即是於妻妾面上。寡恩少義。按伯叔條。親友條。及交接條。凡失敬失愛者。記過之端詳矣。於此復舉列焉。專為待妻妾而加其責備也。**徵事**。劉師文甯波人。流落蜀中。大姓楊翁奇之。納為婿。翁亡後。家業日消。劉欲歸家。就試。婦從間壁窺見其兄手持一券。意甚不樂。往問其故。對曰。妹丈將

歸。昔父命贈田四十畝。奈年來消棄殆盡。今貨栖房
僅得其半。吾不能遵遺命。是以不樂耳。劉聞之。謝曰。
豈有爲人婿而甘令其子賣屋以相界者。急索券焚
之。飄然挈妻以歸。未幾登第。時周給之。且爲多力。培
植致富。每語夫人曰。若兄棄產以遵父命。我雖不受。
心甚感之。必俾之饒樂無憂。乃以安婦翁於地下。劉
後官至侍郎。薄於妻族者。盍觀此。

◎粗暴不能涵容卒成垂傷

發明

庭之整齊。道惟嚴於正身。而又當因端善誘。日漸月
淡。薰蒸浸漬之既久。有不期而化者。若不揆事情。動
輒詬責。必爲頑鈍。爲怨憾。爲離絕。家庭之變。有不可
言者。雖罪在婦人。而養之無方。處之無術。爲丈夫者。
正不能免於責備也。**徵事**陳邦佐以妻不協於母。欲
出之。其友唐一菴諫曰。人情喜怒不常。豈以一失母

心便爲棄婦。他日母追念時。汝悔何及。此時只宜委曲調停耳。未幾姑婦果相協。邦佐卒。其妻甘貧堅守其節。夫不協於母。尚當委曲調停。不可激烈。則夫薄故小失。不當輒加詬責明矣。處家庭間。委曲兩字。可無熟念哉。**附錄**或問於程子曰。妻可出乎。曰。妻不賢。出之何害。只爲今人將此作一件大事。隱忍不敢發。或有隱惡。爲其陰持之。以至縱恣養成不善。豈不害事。人修身刑家最急。纔修身。便到刑家上也。又問古人出妻。有以對姑叱狗。蒸梨不熟者。亦無甚惡而遽出之。何也。曰。此古人忠厚之道也。古之人交絕。不出惡聲。君子不忍以大惡出其妻。而以微罪去之。以此見其忠厚之至也。且如叱狗於親前者。亦有甚大故。不是處。只爲他平日有故。因此一事出之耳。或曰。彼以此細故見逐。安能無辭。兼他人不知。是與不是。則

如之何曰。彼必自知其罪。但自己理直可矣。何必教他人知。然有識者當自知之也。如必待彰暴其妻之不善。使他人知之。是亦淺丈夫而已。君子不如此大。凡人說話多欲令彼曲我直。若君子自有一個含蓄意思。或曰古語有之。出妻令其可嫁。絕友令其可交。乃此意否。曰是也。

三十過

歡愛過情。不留意勸化。

發明

程子曰。男女有尊卑之序。夫婦有倡隨之

禮。此常理也。若徇情肆欲。惟說是動。男牽欲而失其剛。婦狃說而忘其順。則凶而無所利矣。○徐尚公曰。世人動言婦女寡識。性格難轉。姑且由他。省於費氣。是正所爲。養安樂禍者也。夫身爲家主。家之中。事無巨細。咸當有以整齊之。乃可以成家而無敗德。妻室所以爲我內助者。先不能整齊其妻。則所云齊家者。

更何能齊之有。蓋凡戶內事。男子之關心者少。婦人
之經理者多。苟妻室而不合於道。將逐處皆滋過端。
父母失順。兄弟寡歡。親友不洽。子女乏教。婢僕離心。
倫誼乖傷。綱紀廢墜。家且不成其家。率由一人之爲
禍敗也。謂可塞聰掩明而聽之乎。夫有夫有婦而成
家。不念其爲共理家政之人而恬然欲等諸贅疣。有
是理哉。致令任性而行。爲詬邦族。旣以累已終身。抑
亦可謂不愛其室矣。○易經曰。家人利女貞。傳曰。家
人之道。利在女正。女正則家道正矣。可見妻室之關
繫一家者甚重也。聖人一言。照徹古今家人情事。世
之人未有甘心於家道之不正者。則所以訓率其
妻者。其容不留意乎。然惟不狃于歡愛斯能之。◎

得已必置側室。使夫婦成嫌隙。

增註因而薄情者。另記過。
按色慾條有子

娶妾爲三十過惡其不能制慾此條之過則惡其不能處家各有所主也無嫌隙者但記彼過勢難容而強爲者兼記此過此功過格條例之密也必欲與強卽流爲薄待若卒不能強而遺其妾以不得所則又有殘虐婢妾同自犯以論過矣非薄於妻卽薄於妾總有無窮之過身不修而家不齊禍無大於此者故君子之自責切不可輕犯此條也

徵事

明賈御史某

幼聘魏處士女逾笄而女瞽處士將返幣焉御史急娶之魏孺人日請御史置妾御史不可時御史有兄爲戶部納寵京師孺人請益力御史復不可生子蘅弱冠登第○雲間錢璧字伯全爲人端重清慎語不傷氣嘗納一女鬟風姿秀雅性格馴順室人勸先生留爲側室先生正色荅曰我之置此欲以侍巾櫛耳豈有他意汝乃反欲敗我德耶具資嫁之中至治壬

申進士後學多師事焉。賢者之風如此。誌其事以愧天下之強欲置妾者。◎喪耦服未滿。

卽再婚。

并功服未滿者加倍。發明白香山詩曰。人言

夫婦親義合如一身。及至死生際。何曾苦樂均。婦人一喪夫。終身守孤子。有如林中竹。忽被風吹折。一折不重生。枯死猶抱節。男兒若喪婦。能不暫傷情。應似門前柳。逢春易發榮。風吹一枝折。還有一枝生。爲君委曲言。願君再三聽。須知婦人苦。從此莫相輕。

徵事

天順中都指揮馬良最得上龍妻亡上每慰

問適數日不出上怪之左右以新娶對上怒曰這厮於夫婦之道尚薄豈能事我耶杖而踈之○明郎憶川諱孟震年二十九喪妻何氏誓不更娶終身不復齒男女事婦有再醮者挾貲令人道意勃然曰若愧爲婦奈何汚我夜携兩兒蕭然並臥儼若寡女當事

者時賜粟帛。扁其門曰義夫子。元會仕至新安太守。**廣義**謂賢能婦。則不忍忘。理也。情也。若頑劣無回心者。生前卽宜絕夫婦之誼矣。死後又何念乎。

十過

順妻子。廢孝弟。

一小事爲十過。**發明**施愚山曰。嘗

子不宜其妻。父母曰。是善事我。子行夫婦之禮焉。沒身不衰。是我之於妻妾。固不敢自爲愛憎。惟視父母之悅與不悅耳。且書稱秩叙。取其有次序也。敢昵私愛。悖倫之叙乎。愚山又曰。古云。孝衰於妻子。世有一種不肖。父母有所須。則以無爲解。妻子有所欲。則多方力致之。父母切責。則瞋目反顧。其妻妾毒罵。則笑而受之。吁。是何人哉。○青田木竈山居民倪九。惑於婦言。不孝其母。置母爨下。執役如老婢。正德己卯秋。

禾方熟。令母舂新穀。烹鷄治飯。妻兒共餐。餐畢。呼母食其餘。母悲憤不能食。中夜烈風驟雨。有大石自山巔裂墜。正壓倪九寢榻。復破壁而出。一夫一婦一兒皆斃焉。陳中州快其事。因作誅逆崖記。如此大逆。吾輩豈至於此。誌之以儆勸鄉里愚人。○莒州民家有母老病。臥於床。康熙戊申年地震時。其子謂妻曰。汝抱兒速出。妻曰。母在床。奚計及子耶。其扶母出。置其子不顧。及屋盡壞。兒竟無恙。噫。觀此而抱子不顧母者。母未必死。子必不生可知。蓋母猶根。子猶葉也。斬根培葉。徒見本傷而葉萎耳。人何不睡醒焉。○柳開仲塗曰。皇考治家孝且嚴。旦望弟婦等拜堂下畢。卽上手低面。聽我皇考訓誡。曰。人家兄弟無不義者。盡因娶婦入門。異姓相聚。爭長競短。漸漬日聞。偏愛私藏。以致背戾分門。割戶。患若賊讐。皆汝婦人所作。男

子。剛。腸。者。幾。人。能。不。爲。婦。人。言。所。惑。吾。見。多。矣。若。等
豈。有。是。耶。退。則。惴。惴。不。敢。出。一。語。爲。不。孝。事。開。輩。抵
此。賴。之。得。全。其。家。云。○。陳。白。沙。先。生。曰。張。公。藝。九。世
雍。睦。得。力。在。一。忍。字。鄭。內。史。七。代。不。分。爨。惟。不。聽。婦
人。言。夫。忍。字。長。厚。能。之。若。不。聽。婦。人。言。非。大。剛。決。大
識。量。人。未。易。能。也。婦。言。開。釁。最。爲。可。虞。須。爲。夫。者。自
處。於。正。使。婦。言。無。自。而。入。大。要。在。于。見。得。財。帛。輕。恩
義。重。時。以。此。開。曉。婦。人。則。婦。自。不。敢。多。言。而。其。家。可
常。合。而。不。睽。矣。不。然。聽。婦。言。若。響。之。應。聲。視。兄。弟。如
寇。之。入。室。豈。非。所。謂。顛。倒。相。背。者。乎。○。唐。劉。君。良。瀛
洲。人。四。世。一。庖。族。兄。弟。猶。同。產。門。內。斗。粟。尺。帛。無。所
私。大。業。末。歲。饑。甚。妻。勸。異。居。不。聽。潛。易。置。庭。樹。烏。雛
令。鬪。且。悲。鳴。家。人。怪。之。妻。曰。天。下。亂。禽。鳥。不。相。容。況
於。人。耶。君。良。亦。怪。之。乃。與。兄。弟。析。處。後。月。餘。妻。中。夜

忽自言同居勞脫非我安得自便如此問之具吐實
君良卽牽其髮起大呼曰今得破家賊矣哭以告斥
其妻去之召兄弟更復完聚武德中楊洪業至其居
見六院共一庖庭無間言子弟皆有禮節嘆服而去
徐尚公曰劉妻安得自便一語天下喜分析而不喜
同爨之病根惟在於此欲快遂其嗜慾天理自難保
全矣○祠部尚書蔡廓奉兄軌如父家事大小皆諮
而後行公祿賞賜一皆入軌有所資須悉就典者請
焉從武帝在彭城妻郗氏書求夏服時軌爲給事中
廓荅書曰知須夏服計給事自應相供無容別寄嚮
使廓從妻言乃

◎縱任出門遊戲燒香

發明

許台仲

曰主婦職在

中饋烹飪必親米鹽必課勿離竈前女婦日守閨闥
躬督紡織至老勿踰中門下及侍女亦同約束如有

恣性越禮。遊山遊湖。賽神燒香。出露體面。卽非士族家法。子孫必泣諫之。丈夫必痛遏之。○不禁

三姑六婆往來

發明王氏家訓曰。正家之道。宜痛絕

陰智。能揣婦人意。且巧爲詞說。又能鼓動人。妻孥無識。未有不墮其術中。故骨肉之離間。鄉里之忿爭。皆此流搆之也。抑有甚焉。或爲賊之導。或爲奸之媒。其害有不可勝言者。**附錄**周坦然曰。吉祥之宅。十二歲以上小童。不入內戶。內童不出內戶。不可以其小而忽之。何氏曰。僕雖自幼家生者。亦不宜令入臥房。使知篋笥所在。若以爲小而不禁。長大不可制矣。或遣餽送於出嫁之女。止令中堂奉其所尊。切不可徑入內室。與女私受。卽無他慮。亦失規矩。又不可使之訊問消息。萬一搬唆是非。反致構結兩家之怨。按此與

禁閑雜人往來。皆治家規範之要緊者。故連類及之。

三過

聞言不察。暱情輒信。

因而發者。另准事記過。**徵事**。王經事繼母不孝。奉養殊缺。

經有三子。相繼暴卒。經亦喪明。始悔前非。每自言曰。此皆惑聽水邱婦言。誤我至此。後經卒。水邱婦病癰。亦卒。夫人家妻妾。爲人內助。苟有善言。固當從之。但婦人賢明者少。愚暗者多。且其性多褊愎。不耐事情。又巧飾短長。語多中窾。故爲丈夫者。易於迷惑。或畏其悍戾。惟命是從。或惜其嬌痴。有言必聽。近則一家離心。遠則終身受累。敗亡之禍。率由是也。願爲人夫者。戒之。○座右編曰。害莫大於婢子造言而婦人悅。婦人附會而丈夫信。禁此二害。家政肅矣。**增註**白文。聞言二字。所該甚廣。非止謂父母兄弟間。有所搬唆。

不可信也。舉凡親友、婢僕、傭工、鄰佑，以及外人統在所言之中。凡事各有委曲緣由，得諸目擊，猶須平情細審。苟在傳聞，只一詞氣抑揚，輕重便易失實。況其間尚多粧點文飾乎？故傳述之語，必不可輕信。然人惟床第之間，言無不行。所謂睚情而不自覺也。功過格嚴其條，重其過，政欲人之慎防於此歟。

一過遇當行事受制於內不行

增註必謂最小事也。大

學四箴其三爲夫婦言曰：夫以義爲良，婦以順爲令。和樂禎祥來，乖戾災禍應。舉案必齊眉，如賓互相敬。牝鷄一晨鳴，三綱何由正。**附錄**正統中，劉忠愍公球以直諫爲王振所誣死。先是，忠愍與同館鍾復雅厚，封事實約與偕。鍾漏言於夫人，夫人阻之。明日，忠愍如其家，鍾託言他往。夫人於屏後大罵曰：汝自幹事，

何累及他人乎。忠愍驚嘆曰：鍾年兄乃謀及妻孥耶？遂獨舉。未數日，鍾病死。妻每號輒曰：蚤知若是。曷與劉侍講同死。

○聽一稱述家庭惡語不正言禁阻

發明袁

氏世範

曰：凡人家有子弟婦女，好傳遞言語，則雖聖賢同居，亦不能泰然。蓋凡人作事，不能皆合人意，豈免其背後評議此不傳遞，則彼不聞，知若此言彼聞，必從而怨恨。況兩遞其言，或從而增易之，兩家之怨，且至牢不可解。惟高明之人，有聞而亦不聽，則此輩自不能離間我所親矣。愚意聞而不聽，何如不聞之為愈耶。昔賢謂家人內政，不嚴以防之於細微之初，不剛以正之於未然之始，則其悔咎每不可追。蓋不禁其傳述，即使一時不聽，而浸潤既久，終必為其蠱惑。斯以嘆功過格之垂訓為切至也。

附錄

何叔邱為太守時

兄弟因析居相訟。何公察知。爲內讒故。以詩判之曰。只因花底鶯聲巧。致使天邊鴈影分。泣隨筆下。兄弟皆感悟。願終身不析。

○善言相勸不聽。○輕發詈罵。

詩二語爲人傳誦。

因勸諫而發者。加十倍。

廣義

茲編論過。但及罵而不

及毆。蓋妻有均敵之體。爲一家之母。不可則出。加之毆辱。必非士君子所爲。

附錄

東漢仇香。宴居必正衣

服。妻子事之若嚴君。妻子有過。未嘗發聲色。輒免冠自責。妻子庭謝思過。俟香冠乃敢升堂。昔賢以禮御妻如此。今人不溺情相狎。卽反目交爭。安所云夫綱也哉。○呂榮公張夫人。嘗言與公爲夫婦六十年。未嘗一日面赤。自少至老。衽席上未嘗戲笑。必如斯者。乃爲克全夫婦之倫而無愧。

○遇疾病漠不關心。

一日過。

○容任無

所事事華飾嬉遊。

一日一過。**發明**方定之曰。晉書論其風俗。淫僻婦女粧櫛織紵。皆取

成於婢僕。未嘗知女紅絲枲之業。中饋酒食之事。夫此閨中細務耳。而以為關係天下亂亡之由。胡可忽也。席文興曰。有國者且然。家之興敗。更由是可知。○自己逸樂。苛責其勤致。

不睦。

一日一過。

○非有疾病。終日居內室。

一日一過。**發明**檀弓曰。晝居於

內。問其疾可也。夜居於外。問其喪可也。男子晝戒居內室。先賢謂恐其褻慢。身範不嚴。齊家之化有難行矣。曲禮所以謹內外之別也。然此亦僅為富室大家垂訓。庶人當不在內。○見殘虐婢妾。

容任。

同自犯論。

增註

如苛責惡罵等。皆不可不戒論。然貴隱然言之。若當婢妾前致激甚者。亦為過。

廣義 袁氏世範曰。壽昌胡彥持家。子弟不得自打僮僕。婦女不得自打婢妾。有過則告之家長。爲之行遣。婦女擅打婢僕。則撻子弟。此賢者之家法也。

子女

盡倫之五○待一室同居幼年失怙弟姪同

論總論待子女者慈愛固人之常情。然不留心於教導之法。終未全其慈愛也。孔子曰。愛之能勿勞乎。是格立意。亦若是而已。○諸晉三日子孫不肖。莫只嗔恨子孫。當自刻責其已。畢竟有得罪於天人之處。故冥冥償其報也。此先輩至論。然亦有實生福德之子孫。而子孫自以縱欲恣行壞之。子孫之罪。誠不赦矣。乃吾終欲責諸爲父者。其論教培養之功。若何其不究心也。故欲期子孫之嘉美。首重積德。次重立訓。二者兼施。方於爲父之道。

無纖毫欠闕。世之有子孫者。皆愧於爲父者也。卽令天然享賢子孫之樂。亦幸焉耳。○古者人家教童子之禮。詳著於禮經。如七歲時。卽男女不同席。不共食。八歲出入門戶。及卽席飲食。必後長者。始教之讓。十歲出就外傳。住宿於外。女子將幾十歲。恒處於內。不出。姆教以柔順聽從之道。麻枲絲繭之功。蓋防維之也。至嫺習之也。淡。是所爲慈父母之用心也。卽瓊山曰。夫古人有胎教。方其妊子之時。必謹所感。心感於物。則其子形音肖之。故有胎教之禮。傳所謂胎教者。寢不側。坐不邊。立不跛。不食邪味。割不正不食。席不正不坐。目不視邪色。耳不聽淫聲。夜則令瞽誦詩道正事。如此則生子形容端正。才過人矣。古人爲教。方其子在胞胎之中。已謹其所感。及其子在孩提之日。尤謹其所示稟。

之於初者。純全而無偏。養之於幼者。端正而無邪。所見必正事。所聞必正聲。所視必正色。所言必正理。非但男有教。而女亦有教。非但養其身。而又養其心。古之人家。其豫於教者如此。是以他日出而。就教於學校。服役於官府。執事於朝廷。無所往而不可。古之時。人無不成之才。官無或廢之職。事無不就之功者。由此道也。非獨男子爲然。而凡人家之女子。在家無不孝。持已無不貞。爲人妻則順。爲人母則慈。上至宮闈。下至閭巷。若貴若賤。曰男曰女。人人皆有教。家家皆有法。而天下之平。由此其基也。

一功

仁慈一體盡心訓導。

一日一功。**增註**按此蓋謂不偏愛。不暱情。不任意。有無過

不及之道存焉。是無待卒讀全條。而所以善成其子
女者。已總括其中矣。世人樂言教子。噫。孰是能盡心

者哉。○垂一義方訓。附錄。四明王遂初公戒陞隲二子
曰。承家不在名位。而在不失身。敬

身不在外貌表暴。而在毋自欺。讀書當貫古今。處世
必審進退。其或同流合汙。以爲通。矯時于譽。以爲高。
患得患失。以終其身者。吾所深惡。非所望於汝輩也。

○胡文定公與子書曰。立志以明道希文自期待。立
心以忠信不欺爲主本。行已以端莊清慎見操執。臨

事以明敏果斷辨是非。汝勉之哉。治心修身。以飲食
男女爲切要。從古聖賢自這裏做工夫。其可忽乎。○

按格中是條。不過指一正經話耳。若先賢之垂訓。則

從大綱領處起見。其教誡之意。益甚深遠矣。節錄二

則。告天下士大夫之訓子者。不可不識此意也。○又

張先生訓子一則。語極懇切。凡爲父兄者。爲子弟者。讀之俱可。毛竦骨竪。四明鄧西張先生訓子曰。汝兄弟須去靜處。細思一番。幸荷天地覆載。父母養育。生長衣冠之族。遭逢太平之世。肢體俱無虧缺。田宅稍有憑依。各具做好人。會讀書的資質。這皆是天地父母莫大之恩。將何事酬報萬一。只有卓然立志。努力向前。必要做好人。如饑之求飽。行之赴家。腹不飽。家不至。決不肯休歇。始得。要做好人。又不可在外面裝飾。須從心地上。用功。朝朝暮暮。操存此心。不令放逸。卽如一家之中。須是家主惺惺。靈靈。整整。肅肅。端坐堂上。不容閑雜人入門。方成箇家當。心爲一身之主。常存不舍。則一切物欲。烏得而引之。日積月累。庶幾心地光明。動作中節。不問窮達。不論大小。所行皆是好事。始得成箇好人生死受用。皆在於此。若心無

所主而使聲色貨利反入而奪我主位。則動靜云爲皆是賊作主。邪僻放恣何所不至。即使偶得各位適足爲長。欲導淫作過損德之資在一方。則遺臭一方。在一日。則苟生一日。上辱祖宗。下毒子孫。其害有不可勝言者矣。人氣質不同。各有一種欲處偏重。須自已照察。不要瞞昧。試觀人身受病。各有不同。或病心肺。或病脾胃。既有是病。須從這病上求醫藥治。身始得安。若病根既深。不加治療。則元氣銷鑠而大命傾矣。大命將絕。而悔心始萌。何益之有。可不畏哉。今人護過者多。只是欲做好人之志不立。與護病者一般。喪厥身心。均爲天地父母之罪人。慎之哉。慎之哉。

◎延師長誠心敬奉。一日

增註謂苦身奉師。惟恐闕失者。乃可云誠。先以此心事親。則爲孝。次以此心延師。卽爲慈。不異其心。然素

其序亦不得爲功。

附錄

莆田洪氏條訓有云。父兄當

早晚叮囑告誡。一惟師長之言是聽。則子弟自無過

舉。而師道亦尊嚴矣。若見子弟之不善。卽咎及其師。

輕生議論。徒起子弟不誠之心。且并其身同陷於罪。

惡而不知矣。嗟乎。世俗延師。實皆昧此。特拈出之。

廣

義柴文伯曰。每見富貴者。喜豐財多粟。納好寵姬。何

嘗肯隆禮厚幣。延好師席。寵姬辦首飾。則甚易。子弟

買書冊。則甚難。蘭房用度。必是周緻。書院缺典。置之

不問。行事如此。宜乎碩師去。而庸師來。碩師有抱負。

有見識。合則留。不合則去。庸師無學問。以自持。惟佞

諛而媚主。庸師固栖身之謀。一年復留。一年子弟乏

開導之益。一日昏鈍。一日及其長也。塊然一物而已。

耳。

◎受供養。防其苟求。必審察其日用所入。

功。徵事。一。念一。

陶侃家世貧賤。母譙氏命侃就學。紡績資給之。使結交勝已者。鄱陽孝廉范逵與侃善。大雪中來寓宿。母徹所臥新薦。剉以秣其馬。又密截髮鬻以供饌。逵聞大嘆異焉。侃爲潯陽縣吏時。監魚梁。以鮓遺母。母不受。遺書責之曰。爾爲吏。以官物遺我。爲悅乎。是增我憂也。噫。愛子至於如是。展也其可風矣。○崔元暉爲庫部員外郎。其母盧氏誡之曰。嘗見姊兄辛元馭曰。兒子從宦者。有人來云。貧乏不能存。是好消息。若聞貲貨充足。衣馬輕肥。此惡消息。吾嘗重此言。以爲確論。比見親表中仕宦者。多將錢物上其父母。父母但知喜悅。竟不知此物從何得來。必是祿俸餘貲。誠亦善事。如其非禮所得。此與盜賊何別。縱無大咎。獨不內愧於心乎。噫。陶母崔母。皆以婦人之身。而曉然明於大義。何今世士大夫。鮮克念此也。○明太祖數遣

使者廉察諸仕宦家。任公勉之登進士。授鄱陽令。使者至其第。止茅舍三間。父短衣灌園。母布裙紡織。窓壁破敗。器皿陋惡。有寒士所不堪者。使者問子何在。門庭何蕭索如是。父養素先生曰。我令兒子作清官。不欲以脂膏自潤耳。使者給以客遊至鄱。有札寄否。因詒書戒之。畧曰。天道福善禍淫。甚可畏也。勿謂已安已治而懈怠。勿謂已能已足而驕矜。廉察使以書直達宸覽。併陳所居狀。上嘉嘆。旌異之。**附錄**胡質爲荊州刺史時。子威往省。及歸。賜縑一疋。威跪請曰。大人清介。於何得此質撫之曰。此我俸餘。聊助汝糧耳。父之愛子。與子之愛父同。家庭之間。相愛以義。乃所稱世德之門也。故附誌其事於此。

三十功

家範方嚴。不因貴顯後弛教。

徵事李景讓母鄭氏。性嚴明。早寡。家

貧子幼。自教之。宅後牆陷。得錢盈缸。母祝曰。吾聞無勞而獲。身之災也。天如以先君餘慶。矜其貧而賜之。則願諸孤學問有成。此不敢取。掩而築之。後景讓官達。斑白矣。教不弛。勤有過。猶捶撻。出觀察陝西。有牙將忤意。杖之斃。軍士憤憤。欲爲變。母走出庭上。召景讓。跪責曰。天子付汝以方面。豈得以國家刑法爲喜。怒資而妄扑人致死乎。豈特上負朝廷。使百歲老母含羞入地。何面目見汝先君也。命左右褫其衣。庭杖之。將吏皆再拜爲請。久之乃得釋。軍府遂安。景讓克自修立。爲名卿。皆其母之教也。○鄭善果母崔氏。適滎陽鄭誠。誠以討賊戰死。母時年二十。撫善果長成。朝廷愍其父死王事。襲封公。授刺史職。母性賢明。通曉政事。每善果出聽事。母輒於障後察之。聞其剖斷合理。大悅。賜坐。相對談笑。若行事不允。或妄嗔怒。母

乃還室。蒙袂而泣。終日不食。善果伏牀前不肯起。母方起謂之曰。吾非怒汝。獨內愧汝家門。我爲汝家婦。知汝先君忠勤清恪。以身殉國。吾亦望汝副其此心。汝自童子襲茅土。位至方岳。豈汝身致之耶。不思此事而妄加嗔怒心。緣驕樂墮於公政。內則墜家聲。失官爵。外則虧天下法。以取罪。吾死何面目見汝先人乎。善果聞言。輒涕泣嗚咽。叩頭謝請自改。母乃解顏。性節儉。常服大練。非祭祀賓客之事。酒肉不妄陳。其前非自手作。及莊園祿賜所得。一切禮儀。悉不許入門。善果歷任州郡。內自出饌。衙中食之。公廨所供。皆不許受。善果凜母教。亦能克已。自勵爲清吏。○韓忠獻公億方重。教家嚴有法。知亳州。次子舍人綜自西京謁告來省。綜弟絳績及從弟皆登甲第歸。爲治具宴客。坐諸子席隅。坐中問二郎。聞西京有奏讞者。其

詳云何綜思之未得也。訶之。再問不能對。起索杖大
詬曰。吾居千里外。於事無所與。然且聞奏。讞汝食朝
廷祿。爲府倖。一府事巨細。孰非汝事者。乃大罪奏案。
猶然不知耶。汝何以報國。必杖之。諸子股栗蒲伏請。
賓客爲力解。乃已。家法之嚴如此。所以多賢子孫也。
忠獻八子。曰綱。綜。絳。績。緯。縝。絳。績。皆宰相。維門
下侍郎。○陳省華與妻馮夫人俱善教子。以大義不
以寵祿。子堯咨舉進士第一。而堯叟堯佐復同登進
士。宋太宗問誰子。左右曰。是樓煩令陳省華子也。帝
嘉其善教。召爲太子中允。後封秦國公。堯叟娶馬尚
書女。日執中饋。馬於朝路語公。以女素不習。乞免其
責。公答曰。未嘗使之執饋。自是隨山妻下厨耳。馬遂
語塞。每賓客至其家。秦公見之。三子必侍立。左右坐
客。馭踏不安。求去。秦公笑曰。此兒子輩耳。故天下皆

稱秦公教子有法。馮夫人治家極嚴。堯咨守河南還。問曰。汝典名藩。曾有異政否。堯咨慚謝無有。夫人不悅。一日縱言。州當衝要。過客與堯咨射。無不讓堯咨能者。夫人大怒曰。汝父訓汝以忠孝。今不務仁政。教化而專一技成名。豈汝父之訓耶。杖擊之。金魚落地。其嚴如此。長子堯叟至丞相。次子堯佐亦侍從。堯咨狀元至節度使。三子皆爲宋名臣云。

五十功

結親惟擇賢良不計勢利

發明

司馬溫公曰。凡

與婦之性行及家法何如。勿苟慕其富貴。壻苟賢矣。今雖貧賤。安知異時不富貴乎。苟爲不肖。今雖富貴。安知異時不貧賤乎。婦者一家之所由盛衰也。苟慕一時之富貴而娶之。彼挾其富貴。鮮有不輕其夫而

慢其舅姑者。養成嬌惰之性。異日爲患。庸有極乎。借使因婦財以致富。依婦勢以取貴。苟有丈夫之志氣者。能無愧乎。**徵事**李祐爵位既高。公卿多請婚其女。祐皆拒之。一日大會幕僚。言將納壻。衆謂必貴戚名族。及登宴。寂然。酒半。祐引末座一將。謂曰。知君未婚。敢以小女爲託。卽席成禮。他日或請其故。祐曰。每見衣冠之家。締昏大族。其子弟習於淫奢。冬不令終。我以韜鈴致位。自求其偶。何必仰高。以博虛望。聞者以爲卓識。此謂不計勢利者。然必隱有所擇。而出此。非徒矯爲名高可知也。孫明復舉進士不第。退居泰山。教授生徒。被徵至京。枯槁憔悴。鬚鬢皓白。李文定見之。嘆曰。先生年五十。一室獨居。誰事左右。不幸風雨。飲食生疾。奈何。吾弟有女。頗賢。可以奉先生箕箒。復辭。文定曰。吾弟女不事先生。不過一官人妻。先生德

高天下幸脩李氏榮貴莫大復嘆曰宰相女不妻公
侯貴戚而以嫁山谷衰老藜藿不克之人吾不可不
成相國之賢娶之女亦甘淡泊若此真所謂惟擇賢
良者主於擇賢良尚安有勢利之見存於中乎廣義
袁氏世範曰人家有男雖欲擇婦有女雖欲擇脩又
須自量我家子女何如如我子凡下若娶美婦豈特
不和或生他事如我女不如彼子萬
一不和卒爲所棄此亦不可不慎也

百功嚴立家訓使子孫世守爲禮義名家

徵事唐河東節度使柳公

綽在公卿間最名有家法中東門有小齋自非朝謁
之日每平旦輒出至小齋諸子皆束帶晨省於中門
之北公綽決私事接賓客與弟公權及群從弟再會
食皆不離小齋自旦達暮燭至命子弟一人執經史

躬讀一過訖。乃講議居官治家之法。或論文。或聽琴。至人定鐘。然後歸寢。凡二十餘年。如一日也。居外藩。子來省入境。郡邑未嘗知。既至。每出入。常於戟門外下馬。呼幕賓爲丈。皆許納拜。未嘗笑語。欵洽。公綽卒。子仲郢亦端謹好禮。起居一遵父法。三爲大節鎮。廩無良馬。衣不薰香。私居未嘗不拱手。內齋未嘗不束帶。退公布卷。晝夜不捨也。少辟武昌幕府。牛僧孺見其風矩。嘆息曰。非積習夙教。安能及此。子珪璧珙。一登第早卒。一爲翰林學士。一爲御史大夫。皆清直有父祖風。○宋胡安定先生治家甚嚴。閨門整肅。尤謹內外。兒婦非節朔不許歸甯。子弱冠。常侍立左右。賓至則供茶湯。當時卿大夫咸稱述其家範云。宋曹矩字誨之。休甯人。竭誠事親。以純孝聞。嚴有家法。垂示子孫。登景祐進士。父汝弼贈殿中丞。燎黃之久。芝產。

先塋詔賜所居爲忠孝鄉孝芝里孫夬字無忌孝謹
端直申飭家訓爲徽州倖死於方臘之難贈朝奉大
夫今子孫蕃衍時稱忠孝曹家**附錄**崔刑部李夫人
西平王晟之女也晟生日中堂大宴有婢附崔氏婦
耳語崔氏婦領之而去有頃復來晟曰何事女對曰
大家昨夜小不安適使人往候大家者婦稱其姑也
晟怒曰吾不幸有此女汝爲人婦豈有阿家病不檢
校湯藥而與父作生日遽遣歸身亦續至崔氏家問
疾且拜請教訓不至晟治家肅整貴賤皆
不許時世梳粧勲臣之家稱西平禮法

◎爲子孫

慎擇賢師友

發明

朱晦翁曰父兄督教子弟惟在慎
擇所與廣延端方博聞者與之遊處化

赤鄰丹爲黥邇墨名師勝友相與熏習不覺久而自
化矣○顏壯其曰英少之年最可有爲此時若能道

正言。行正事。將來身可立。業可成。若同學同群。少或不慎。則出言之是非。制行之端曲。所關一身之樞機者不小。○座右編曰。教子弟如養閨女。最要嚴出入。謹交遊。一接近匪人。是清淨田中下一不淨種子。便終身難植嘉禾矣。**徵事**周濂溪先生。潛德隱耀。人莫知者。獨二程父珦知之。遣子受學焉。兩先生倡明絕學。師世淑人。其始基得力。實濂溪開之也。朱子父松將沒。命之曰。劉原屏。胡籍溪。李愿中。三人。學有淵源。我死。子稟業焉。朱子奉遺書。受學三君子。卒爲大儒。○張密學密省之母朱氏。親教督二子讀書。客至。輒於窓間聽之。客與其子論文學政事。則爲之設餽饌。或閒話諧謔。則不設也。後二子皆登第。南鄭楊相妻秦瑛。教訓六子。動有法矩。次子仲珍。嘗白母請客。客至。無賢者。母怒責之。仲珍以是惟擇賢者交。卒成名。

○陽明先生客座私祝曰。但願溫恭直諒之友來此。講學論道。示以孝友謙和之行。德業相勸。過失相規。以教訓我子弟。使毋陷於非僻。不願狂燥惰慢之徒。來此博奕飲酒。長傲飾非。導以驕奢淫蕩之事。誘以貪財黷貨之謀。冥頑無耻。扇惑鼓動。以益我子弟之不肖。嗚呼。由前之說。是謂良士。由後之說。是謂凶人。我子弟苟遠良士而近凶人。是謂逆類。戒之戒之。嘉靖丁亥八月。將有兩廣之行。書此以戒我子弟。并以告夫士友之辱臨於斯者。請一覽教之。○朱子與長子受之書曰。交遊之間。最當審擇。大凡敦厚忠信。能改我過者。益友也。其諂諛輕薄傲慢褻狎導人爲惡者。損友也。推此求之。百無所失。但恐志趨卑凡。不能克己從善。則益者不期䟽而日遠。損者不期近而日親。此須痛加檢點而矯革之。不可荏苒漸習。自趨小

人之域。

附錄

侯仲兼曰：子弟自八九歲，方有知識。以

至於未曾婚配，此數年內，關防極宜留意。蓋恐情竇

一開，潰決難遏。不特品行攸係，兼且性命可憂。父兄

力苟能為，必當延師在家，勿使寄學他人之室，請師

務擇端嚴方正之人。蓋不方正者，非果慮其有苟行，

卽語言意氣，子弟之觀聽存焉。不痛絕夫風流艷麗

性情，卽引而蕩矣。乃若同窓之友，本求相長有益，而

不知其陷害實深，嘗有嚴師所不及察者。又或狡童

誘引，以致褻穢難言。

凡此皆當防慎也。

◎富貴不爲子孫資緣功名事徵

董大叅朴家居，適有門生監試秋闈，先密封試題，授

公。公發書，卽焚之，曰：「上欺君，上下妨人。才，吾不爲也。」

是年其子竟中式。○陸遜與全琮書曰：「子弟苟有才，

不憂不用，不宜私出以邀榮利。若其不才，終爲取禍。」

朱文公與卓夫人書云。聞尊意欲爲五哥經營幹官差遣。某竊謂不可。子弟生長富貴。本不知艱難。一旦仕宦。便爲此官。無不傲慢縱恣。觸事懵然。愚意營一稍在人下執事。吃人打罵差遣。乃所以成就之。二賢之論。真富貴家善後之至訓也。○顧涇陽先生嘗戒其長君曰。凡爲父兄。莫不愛其子弟。莫不願其讀書進取。今府縣考童生。吾始終不欲以汝名聞於主者。非恕也。非棄汝而不屑也。吾自有說。就義理上看。男兒七尺軀。頂天立地。如何向人開口道個求字。孟夫子齊人一章。便是此字行狀。讀之汗顏。不可作等閑認也。就命上看。窮通利鈍。墮地已定。如何增損得些子。眼前那個不要做秀才。到底有個數在。若可以勢求。可以賄求。那不會求的。便沒分。造化亦炎涼矣。就吾分上看。本無尺寸之長。賴祖宗之庇。倖博一第。再

仕再不效。有邱山之罪。猶然煖衣飽食。安享太平。在昔大聖大賢。往往厄窮以老。甚而流離顛沛。不能自存。我何人斯。不啻過分矣。更爲汝干進。是無厭也。就汝分上看。但在志向何如。若肯刻苦讀書。到底工夫透徹。科甲亦自不難。何有於一秀才。若尤肯尋向上去。要做個人。卽如吳康齋胡敬齋兩先生。只是布衣。都成大儒。至今說起兩先生。誰不敬慕。連科甲亦無用處。何有於一秀才。汝試繹而思之。識得此意。省多少悶心腸。省多少悶氣力。省多少悶悲喜。便是一生真受用也。

三百功

曲成善教。造就子孫爲盛德大器。

徵事

程母侯

氏大中公珣

之妻明道伊川二先生之母也。仁恕寬厚。大中公有所怒。必爲之解。惟諸兒有過。則不掩也。常曰。子所以

不肖。皆由母蔽其過。而父不知也。生六男不育。惟二先生存。愛慈甚恩。而不弛於勤教。纔數歲。行而或踣。家人走前扶抱。恐其驚啼。母未嘗不呵責。曰。汝若安徐。甯至踣乎。飲食必置之坐側。食絮羹。卽叱止之。曰。幼求稱欲。長當何如。雖使令輩。不得以惡言罵之。故二先生平生。於飲食衣服。無所擇。無惡言詈人。教使然也。稍長。常使從賢師友游。雖居貧。或欲延客。輒喜爲治具。有知人之鑒。勸二子學時。已逆知其遠就。後世誦程母之教。同於孟母云。○張魏公浚母計氏。方正有儀法。浚父官華州。早卒。氏年二十五。父母欲嫁之。誓不許。浚能言。卽令誦父所爲文。能記事。卽告以父言行。無頃刻失教。甫冠。與計偕。入國學。母送之。拊其背泣曰。門戶寒。賴爾成立。當朝夕。以爾祖。爾父之業爲念。條勗戒語數十端授焉。浚隆貴。所爲不當意。

必變色示戒。謫永州。欲論秦檜奸。恐禍不測。爲母累。憂之至體爲瘡。母怪問。以實對。母不應。惟誦。浚父紹聖初對策曰。臣甯言而死於斧鉞。不忍不言以負陛下。浚意遂決書上。竄封州。母送之曰。行矣。汝以忠直得禍。何愧。惟勉讀聖賢書。無以家爲念。其賢如此。浚爲名宰相。封魏國公。孫棫爲大儒。封伯。累贈母秦國太夫人。○朱近修曰。王海曰。先生有高識。陽明捷南宮。廷對後。謝本齋當國。夜謁王曰。餘姚有盛事。公知之乎。王曰。何事。曰。父子狀元耳。王跪謝曰。守仁狂率。目無前輩。願公抑而成之。謝遂寢其議。嗚呼。人莫不欲貴其子。却元而成其子。不朽大器。由今觀之。文成視一元真藐如矣。

千功

積陰功遺澤子孫

發明

有德之人。身享令名。然亦有沒沒無聞。則必大發於其後。

光前則重顯親。裕後尤重陰善。○司馬溫公曰。積金遺後。未必能守。積書遺後。未必能讀。惟積陰德於冥冥之中。子孫實受享用。**徵事**薛玠字藩卿。未中時。夢其父同二老。一身半小。一身絕小。同聲謂藩卿曰。你只說中舉中進士容易。先要考我們陰隲。途間受了多少辛苦。方得汝榮顯。吾兒當積德以遺子孫。玠問二老爲誰。父指曰。半小者。汝祖父也。絕小者。汝曾祖也。玠醒。頗駭異之。嘗向人述其語。旣而果聯捷。○雲南嚴恭肅公清。其父諱瑛。名醫也。好義樂施。人求療者。卽合藥與之。如遇貧人。加銀五分施之。以爲粥餌之費。積有年所。後舉恭肅。性魯鈍。父曰。余力行善事。而生子不慧。奈何。夜夢神摩恭肅頂而針焉。有氣沖出。卽過日。成誦時。鄰有死者。三日復甦。言至一宅第。有穹碑。王者令記碑語。傳示人間。語云。醫生嚴用和。

施藥陰功多。自壽添二紀。養子掇高科。恭肅登嘉靖甲辰第。歷官冢宰。孫似祖。庚辰進士。亦爲尚書。○張八公家富好施。鄉人德之。號張佛。產分二子。每歲禾穀。索銅錢六十文一把。值歲歉。鄉價八十。其子亦增之。八公坐於門。看糶者出。問其價。曰畧增些少。八公以錢還之。自後其子價不敢增至曾元孫。皆登第。黃溪馮公爲人本分。亦好施。人以呆稱之。其子夢蘭登進士。鄉人謠曰。張八佛子。孫享其佛。馮大呆子。孫享其呆。

千過 **積隱惡遺殃子孫**

發明 惡人之後。每易蕭條。或爲陽惡。則外負惡名。內無藏蓄。其

報猶輕。若爲隱惡。固殺子孫之利刃也。不得絕嗣報。卽令子孫困窮凶短折。或則閨門醜行。總之所犯過。

惡而不令人見。不令人知者。卽是隱惡。較諸強暴之人。慘報特甚。先賢云。陰條輔王法所不逮。能瞞人。益以怒天。此言確絕。○姚承菴先生家訓曰。創業者。皆期子孫之繁盛。然其本在一仁字。桃梅杏果之實。皆曰仁。仁者。生生之意也。蟲食其內。風透其外。能生乎哉。人心內生淫慾。外肆奸邪。卽蟲之蝕。風之透也。能生乎哉。尚慎戒茲。爲生子生孫之大計。**徵事**何應元爲蘇州府吏。生子名紳。方四歲時。岳父喚甥歸。路由凌家山。至更餘。忽見人馬燈火。自北而來。轉報曰。何爺過此。於是人馬燈火轉西去。乳母同述其事。應元以已子必貴。年十七。忽雙瞽。應元恚恨。聞直塘道士能召神。因請禱。神附乩書云。汝子應科第。但汝作吏受人賄。造款單。陷數人於獄。天絕爾嗣。此子將生有德家矣。未幾紳死。○虔州王汝弼言行不苟。里稱端

士其東村劉良西村何士賢祖父俱積德崇甯癸未兩姓各生一子俱穎異過人延汝弼爲師良與士賢家貲富饒不能克承先志務爲刻剝政和辛卯三月汝弼立於門有人馬過如官府狀尾之見於何氏之門作指畫狀隨即入劉氏之門詢諸劉何兩家皆不知也俄焉癘作不數日家人死者十餘二子亦斃焉是秋汝弼忽見二人揖於前曰我冥役也君壽算已盡故來相邀汝弼乃沐浴更衣端坐而逝二日復甦語妻子曰吾入一城府見王者垂冕衣衮曰汝陝西乾州王汝弼乎曰乃江西虔州王汝弼也因閱其簿籍曰誤矣汝壽祿且遠命綠衣人送還忽憶劉何二子之亡請其故王者曰二子左輔右弼也天曹錄其祖先陰德大昌厥後不意劉良何士賢處心行事悉反其先世天曹怒使奪其子亦將盡掠其家貲王因

呼劉何詳告之。劉何咸涕泣悔過。由此抑已濟人。大改前失。乙未復各生一子。劉名兆祥。何名應文。仍延汝弼訓之。及長同登紹興癸丑進士。後汝弼卒。兆祥使安南。應文使嶺北。俱遇汝弼於道。騶導赫耀。叩之曰。上帝以我爲儒清潔。立心正直。命我總理刑賞。世人。有善則錄奏之。受天之慶。有惡亦錄奏之。受天之譴。子其勗諸。遂揖別而去。後二子會於朝。語及遇汝弼得勸誠之詞。皆膾合焉。○韓山子曰。人每臨終時。憂子孫異日貧苦。不思子孫貧苦從何而來。乃從祖宗積惡中來。平日專事苛刻。計便宜。凡損人利己之事。靡所不爲。是日日殺子孫也。平時殺子孫。至臨終則憂子孫自我殺之。復自我憂之。不惑之甚哉。○薛文清公曰。人之子孫富貴貧賤。莫不各有一定之理。世人不明諸此。往往冒昧禮法。取不義之財。欲爲子

孫計。殊不知子孫誠有富貴之命。今雖無立錫之地。以遺之。他日之富貴將自至。使其無富貴之命。雖積金如山。亦將蕩然不能保矣。況不義而入者。又有悖出之禍乎。如宋之呂文穆。范文正諸公。咸以寒微致位將相。富貴兩極。曷嘗有賴於先世之遺財乎。

三百過

養成惡德致爲敗類

徵事

昔有一巨盜臨刑。其

母來饋食。盜齧母之臂。至

流血。謂人曰。吾今日之死。實母致之也。吾少時取人

一針。竊人一草。毋從無禁阻。反歡喜之。積久成習。豈

慮有今日乎。

廣義

馬伏波誡子姪曰。龍伯高敦厚周

慎。謙約節儉。我愛之。重之。願汝曹效之。杜季良豪俠

好義。憂人之憂。樂人之樂。父喪致客。數郡畢至。我愛

之。重之。不願汝曹效也。效伯高。不得不失。爲謹。敕之。

士效季良。不得陷爲天下輕薄子。今世俗貽謀與馬公相反。以謹敕爲庸愚。以輕薄爲英俊。樂子孫之爲惡。長浮僞之澆風。若此者。其端一失。其弊何窮。毫釐千里之謬。未始不易流於養成惡德。爲父兄者。慎之。○程明道先生曰。憂子弟之輕俊者。只教以經學念書。不得令作文字。子弟凡百玩好。皆奪志。至於書札。於儒者事最近。然一向好著。亦自喪志。觀程夫子言。不益見浮薄之風宜痛絕乎。○屠緯真曰。富貴純袴之子。少而聰穎。援筆立賦。矢口成文。高步濶視。睥睨千古。凌轢一世。厥心內滿。厥氣外盈。已不勝其骯髒之習。而食客遊士。又爲之譟曲導諛於其父兄之前。一文出。奴僕班揚。一詩成。伯仲李杜。井中之蛙。無復天地夜郎王。何知漢大以富貴凌人。而以才俊濟之。角蛇翼虎。何所不至。釀成淫毒。而莫知禁忌。傾家喪

身絕祀。顧反不如椎魯無能保家之主也。余嘗與貴介豪俊言。見其縱衡飄忽。目無所不空。口無所不擊。又方盛有時名。雙睫如炬。電光其舌。傍人雖欲與復一語。捍不得入。嗟乎。富貴之爲害。一至於此。余願士大夫之教子。必先坊以禮義。教以謙抑。折其驕亢。蕩其粗鄙。而後課以藝文。責以古今。一事之能。慎無輕獎。一語之俊。慎無妄誇。是乃真能愛其子弟者也。

◎溺殺所生

徵事 宋河東人元秀家財

四十餘萬。生子四人。其餘諸妾所生。不問男女。並瘞埋之。一夕夢中見十數兒來追殺。元秀驚起。手足盡變牛蹄。展轉千狀。大叫三日。自言子無嫡庶。何忍殺庶而留嫡。頭斷而死。四子相繼病亡。宋談訓之妻賴娘。怨已多子。以藥墮胎數次。乾道戊子年。又孕。復自墮落之。遂血崩不止。臨終見數小兒前後啼哭。彼扯

此拽謂其夫曰在我面前兒女纏繞苦不肯去奈何。展轉終日而死。○施愚山曰此等殺業慘動天地。冤結屢世。今舉世相沿真可痛哭流涕。又曰今世不舉男子者尚少惟溺女一事江楚閩浙間相習成風。一日之內殺女千億。予嘗作溺女歌戒之曰勸君莫溺女。溺女傷天性。男女皆我兒。貧富有定分。若云養女致家貧。生兒豈必皆怡親。浪子千金供一擲。良田美宅等埃塵。更兼兄弟多嫡庶。同室操戈越與秦。豪華不少貴公子。覆宗滅族空酸辛。若云舉女礙生兒。後先遲速誰能知。當堦玉樹多先折。老蚌雙珠不厭遲。好生戒殺天帝喜。墮胎殺卵神明悲。試看詒謀惟積善。實氏燕山桂五枝。有女莫愁難遣嫁。裙布荆釵是佳話。婚不論財禮義存。擇婚安貧免牽呈。漫憂養女玷家聲。爲兒娶婦亦關情。潘先百惡爾先戒。不種孽

根孽不生。富者殺女轉蕭條。忍心聚斂家暗消。盜賊
天災與訟獄。在君百計總難逃。貧者殺女終不富。家
無擔石身無袴。男耕女織衣食豐。何如骨肉圖完聚。
殺女求兒兒不來。暮年孤獨始悲哀。不如有女送終
去。猶免白骨委蒿萊。贖人妻女救人殃。陰陽纏綿後
必昌。若還多女竟無男。前生債主今生償。勸君莫殺
女。殺女還殺子。仁人有後惡人亡。桂折蘭摧疾如矢。
勸君莫殺女。殺女還殺妻。生殄嬰孩死索命。冥間纏
繞多悲懷。勸君莫殺女。殺女還自殺。孽冤相報幾時
休。轉劫投胎定天札。孺子入井尚堪憐。如何摘女葬
黃泉。及笄往嫁尚垂淚。何忍懷中輒相棄。古往今來
多殺機。可憐習俗不知非。人命關天況骨肉。莫待回
首淚

沾衣

百過家教重名利輕禮義

發明

陸梭山家制曰教子當以孝弟忠信仁義之行使不

得罪於尊卑上下可矣。今則不然。但教以科舉之業。場屋之文辭而止。朝夕之所從事者。名利也。寐食之所思維者。名利也。相聚而講究者。取名利之方也。言及於名利。則津津然有喜色。言及於孝弟忠信。則淡然無味。夫謀利而遂者。不百一。謀名而遂者。不千一。以百年之身。乃徼幸於不百一不千一之事。亦已愚矣。○薛文清公曰。富貴利達。在天無可求之理。德業學術。在人有可求之道。誠欲厚其子孫。以可求者教之。善矣。不求之以可求。而必欲以不可求者厚之。豈非愚之甚耶。○陸文安公曰。人家之興替。在義理不在富貴。可謂至言。**附錄**天順間。兵部尚書鄺埜初任陝西副使。有聲於時。父爲教職。埜嘗以俸易紅褐寄

之父大怒曰。汝掌一方刑名。不務洗冤澤物。乃索此不義之財。污我乎。封還。以書責之。埜欲見父。無由。及秋闈。乃謀僚友。聘其父分考。父大怒曰。此子無知。汝居憲司。吾爲考官。何以防範。且將遺誚於人。又以書罵之。埜一念之孝。不自伸。迎書泣受其教而已。繼爲府尹。益勵清操。聲價愈高。遂至極品。稱名臣。顏光衷曰。此父真空谷足音者。近來父兄訓子。自其挾策。便以田園山宅望之。一旦高翔。胡能辦此哉。然觀海內大家。歷世厚福。皆以清德。忠孝。世濟其美。未聞濁富之家。能繩繩不替者也。語云。百世之計。樹德。吁。是可爲衆父父矣。

◎不量子孫才質爲之區處擇業。致令一無

所就貽誤終身。

發明

愚觀士人家犯此最多。明知讀書無成。又不授以職業。貿易經營。委

諸乏本。九流藝術。病於無傳。至若農圃蠶織。足以習勞苦者。又鄙耻而不屑爲。於是習成遊手遊食之人。閒度歲月。毫無作爲。旣失謀身之策。且多長惡之端。獨居而淫。群處而蕩。殞生傷德。靡所不至。皆由無業而然。豈非其父祖之咎歟。○陸放翁家訓曰。子弟才分有限。無如之何。然不可不使讀書。貧則教訓童穉。以給衣食。但書種不絕足矣。若能布衣草履。以事農圃。足跡不至城市。大是佳事。關中村落。有魏鄭公庄。諸子皆爲農。張浮邱過之。題詩曰。兒童不識字。耕鑿魏公庄。夫仕宦豈能常哉。不仕。則農業可無憾也。○陳氏家規有云。子孫不得閒散無業。質鈍廢書。卽宜習爲耕種。佐理一家。若智力俱不足。備給使令。以及女紅紡織之事。咸可爲之。總要禁絕其佚遊放蕩。猶可免爲廢物。○古詩云。少年輕歲月。不解早謀身。晚

歲成無益。低眉向世人。○唐元徵狀元云。今天下有
三事沒處法。燕都士大夫得病。無良醫。秦晉人種田。
無水利。三吳縉紳子弟讀書。無家
教一味。但靠天耳。此言切中時弊。

五十過

已身縱逸。無以垂範。

發明 功過格於子女一條。
諄諄主重教訓。而特列無

以垂範之戒。深嘆其用意何周至也。蓋凡教人者。不
專恃口耳之功。必以身範為主。身範既立。則所以訓
誠之者。不期而自格焉。非同於迫懾矯強者也。縱逸
之人。往往無意教子。爲父需不教其子。過誠非細矣。
萬一窺見一班。知子之不可不教。而忽畧於身範。惟
以禁令束縛。謂是嚴父之道。當然吾知其子。不過苟
且緣飾。以幸免於誅責耳。其中心之頑鈍。不服自若
也。以其不服之心。而求全不已。則必怨讟隱藏。一旦

而狂悖猝發。未始不當深慮。父之臨子。與君之臨民。情固相同。大學云。其所令。反其所好。而民不從。孟子云。夫子教我以正。夫子未出於正。則是父子相夷也。聖賢之論。豈非透徹人情者歟。故無以垂範。卽是不能爲人父。爲人君者矣。尚安望其尊臨統率哉。揆原責本。其過直與全條爲關係也。莫僅以五十過視之。○季康子問於公父文伯之母曰。主亦有以語肥也。對曰。吾能老而已。何以語子。康子曰。雖然。肥願有聞於主。對曰。我聞之。先姑曰。君子能勞。後世有繼。子夏聞之曰。善哉。商聞之曰。古之嫁者。不及舅姑。謂之不幸。夫婦學於舅姑者也。席文輿曰。然則爲舅姑者。不亦難乎。問。嘗謂爲人父者。語言動作無一非。所以教其子。慎毋易言爲父也。故曰。身不行道。不行於妻子。又曰。學爲人子。然後可以爲人父。◎爲一

不才子孫寅緣功名

發明

賦質遲鈍。冀望倖獲功名。

亦人情也。然須積德以求之。爲

之寅緣。則違條犯法矣。豈君子所宜乎。且已爲寅緣。必有受已寅緣者。貽人以誣上行私。不忠不廉之事。尤君子之所不忍者也。附誌一事於此。○歸安仰思忠精於堪輿。六合尹林克正延之入閩。爲其婚某氏。葬父得一極佳地方。點穴間。雨驟至。遂下山。是夜思忠夢神語曰。此地切勿與某某爲考官時賣三舉子。當有陰禍。若葬此地。非天意也。思忠明日訪之。果如夢。遂託故辭歸。越三年。問其鄉人。則某氏與勢家爭壙地。致死人命。官司牽纏。至今未葬。家業亦凋零矣。夫賣舉子而獲罪於冥。雖曰考官自己貪財。實由寅緣者累之也。故凡富貴人。冀望功名。不特當存自愛之心。尤當存愛人之念。○昔羅文莊公兄弟叔姪。先

後登高第。公由冢宰歸養。庭訓甚嚴。仲子謁選。乞貽書當路。圖仕南方。以便省問。公曰。數字不足惜。惜認義命二字欠確耳。平生訓汝。謂何而有是言。竟不與。嗟乎。如文莊公。可謂淡於愛子孫者矣。故其富貴累世不絕。貽謀燕翼。庸可忽乎。

◎待媳及婿不量才德以貧富異情

待異居弟姪同徵事。杜祁公微時。客濟陽縣。縣令知其必貴。令大姓相里氏與之結婚。相里氏不欲。祁公遂別娶。既而早亡。令必欲以相里氏女妻之。乃召相里氏之弟曰秀才杜君。人才足依。無違吾意也。議定。其兄悵然曰。俾教諸兒讀書耳。未成婚而公登第。相里氏兄厚資往見之。公曰。婚姻定。其敢違。但某出仕。頗憂門下無教兒讀書者耳。相里兄大慚。以歸。附錄顏氏家訓曰。世有痴人不識仁義。爲子娶婦。恨其生

資不足。倚作舅姑之尊。蚩虺其性。毒口加誣。不識忌諱。罵辱婦之父母。却云教以婦道。不孝已身。不顧他恨。但憐已之子女。不愛已之兒婦。如此之人。陰計其過。鬼奪其算。切勿與之鄰近。不幸爲親戚。切勿與之往來。按白文所稱。不過謂意念之間。有異視耳。何至如顏氏所言。然而義理不明。純任私欲。其流惡之極。不能保士大夫家必無是也。故錄誌於此。以爲萬一之儆戒焉。◎撫養應繼之姪爲

嗣。有子後。徇私異視。

三十過

延師在有意無意間。未嘗有誠心。

一年爲三十過。附錄劉忠

宣公曰。人情有大相反者。愚人不爲。智者偏甚。如有竭數千金嫁女。而不聞數百金教子。有不遠百里。餽

厚禮請訟師。不聞不遠百里。餽厚禮聘賢師。有極金玉繒帛以送富貴。不肯費數金以賑貧人。此大不可解。**廣義**徐紫崖曰。爲人子。爲人父。爲字。非可輕言。必做得來。徹始徹終。纖毫無愧。方完全得。一爲字。○方善。長曰。天下事。無不以好逸而壞。好逸則惰慢矣。且如慈父之爲其子計也。甯有不顧惜之。籌慮之。欲使之萬全而後已。而乃忽畧不經心者。則竟有之矣。無他。好逸而惰慢也。故子之事父。逸且惰者。必不能盡竭力之誠。父之有子。逸且惰者。必不能盡教養之職。儘有可造之資。生於其家。而卒至於無所成就。愛惜人材者。甯無致歎於不幸也哉。雖人之能自奮發者。本無待承藉之有基。然使德業相傳。滋培長育。多方而輔翼之。不尤易以玉成也乎。如孔孟程朱。其家庭真有至樂存焉。爲父者誠愛其子。慎無忘所以玉成。

之也。○魏莊渠先生。理學大儒也。嘗觀其大父曰。孫校在官。吾欲成爲清白吏。其以田三百畝。廩之以養廉。其父曰。家務勿以經心也。吾自主之。吾欲汝惟志其遠者大者焉耳。嗚呼。若是之祖父。其所以望其子孫者。真有無窮之勤勞籌畫也哉。○結親不擇賢良。惟知勢利。發明

重愛其子女。結親動以富貴爲期。豈知德行不足者。毋論性習可憂。卽其冰山之倚。轉眼易失。異日者。子有無窮之累。女懷失所之悲。甚矣其不可無長慮也。○虞翻寄弟書云。長子當爲娶婦。不妨求之小姓。天之福人。不在貴族。芝草無根。醴泉無源。王達善曰。貴族大姓。有爲富不仁者。福已泯而禍必至。吾苟與締姻。鮮不爲所及。真達人之見歟。○陳幾亭曰。俗觀以爲盛。有識以爲衰。家風日趨於奢。其勢難久。猶之好

花盛放彫謝。匪遐紅袍滿塲。綺筵將散。可不慮乎。趨奢之故。全因婦人挽救之道。惟擇清勤朴素之家。察其女之性情。取以爲媳。入門之後。主持自定。可以佐君子。可以風妯娌。可以式後人。此反朴還儉之本圖也。若攀華門。習靡麗。婦一入門。競相驚炫。雖使長者訓言諄至。以一身率先之。譬如引鶩登山。迴瀾既倒。力窮而功半。可及悔乎。此極言勢利之爲害也。**廣義**俞毅修曰。秦人家富子壯。則出分。家貧子壯。則出贅。無禮義之俗。自昔爲嘆矣。乃今之世。大抵皆然。余尤惡夫出贅一節。夫娶妻是人家重大事。承宗祧。傳子姓。理中饋。事舅姑。胥於是乎攸賴。是以先王制禮。繁重委曲。誠嚴敬其事也。易曰。物不可以苟合。今則惟以得婦爲期。苟而成親。則幸矣。忘六禮之深意。操輕重於婦家。丈夫失權。妻孥怙勢。父母且不能有其子。

又何有於翁姑之尊嚴乎。坐是家室之中。全無體局。并寵分疆。褻鋤德色。勃谿諍語。不堪聽聞。蓋無先王禮義以相維。其弊必至於此。人奈何見一時之利。棄先王而徇末俗。以貽此大憾也。庶民之家。無論已。苟讀書爲士者。慎勿爲之。

二十過

過愛養嬌。成其惰逸。

發明 逸周書曰。愛子之道在於教。教子之道在於嚴。

嚴斯成之也。愛而不教。猶不愛也。教而不嚴。猶不教也。區區於飲食服色者。末矣。○呂東萊曰。世有愛其子者。坐之高堂。食之芻豢。足跡未嘗及門。自以爲愛之至矣。彼鄰人之父。則不然。使其子躡屨擔簦。犯風雨。冒霜雪。以從師友於千里之外。伶仃顛頓。雖道路之人。莫不竊議其父之不慈也。及觀其終。則有一人。

焉。不辨菽麥。頑嚚無知。問之何人也。乃向之足跡未嘗及門者也。有一人焉。知類通達。爲世名儒。問之何人也。乃向之顛頓數千里者也。彼爲人父者。將使其子無知爲愛耶。將使其子有成爲愛耶。雖甚愚者。亦知所擇矣。**徵事**廣德守趙次山公。方崖公大佑之。大父也。方崖髫年。夜讀。懷炭少許。次山見之。叱曰。少年當習苦。爾乃不能耐寒耶。彼霜天雪夜。朝臣待漏。猶不免苦寒耳。人生未老而享旣老之福。則終不得老。未貴而享旣貴之福。則終不得貴。方崖謹佩斯訓。官至大司寇。以清介稱。○劉摯兒時。父居正課以書。朝夕不少間。或謂君止一子。獨不加恤耶。居正曰。正以一子。不可縱也。後爲名臣。○明太祖一日謂群臣曰。昨到鍾山。令侍御僕從先往。中有一小僮。亦前趨。記其姓名。今日召至。以示諸子曰。此小僮與爾等年相

若已能奔走服役。爾曹不可恃年幼怠惰不學。當朝夕勤勵可也。朕之意惟恐居富貴耽逸樂耳。

◎

容任一必不可爲惡習

徵事

包蒙泉兄弟爲御史。有風力乞養母歸。奉母至孝。母

訓二子絕嚴。一日問二郎席間坐何人。家人答曰某甲。又問談何事。曰適某所有一女子。謂可買爲姬也。夫人大怒。呼次子數之曰。某甲者。以巧舌誑人者也。不親賢人。君子而親小人。不談文史。道德而言買姬。媿耶。吾不忍坐視。若敗而家。經月不與其子語。次子朝夕匍匐跪床頭。其兄亦爲涕泣求解。必絕某勿與通而後已。

◎擇師不慎致其子有損無益

發明

程子之論師曰。記問文章。

不足以爲人師。以所學者外也。故求師不可不慎。所謂師者。何曰理也。義也。○李謙菴曰。擇師以行爲主。

次論其文。文亦必須求取有原本。近性靈者。一味勦襲浮游。縱使文名鵲噪。無裨教益。世人無不欲擇師。而每不知所以擇之之法。徇於虛名。其誤子也實甚。○顧氏家訓曰。蒙師宜延立教有法。而寬嚴得中者。經師宜延人品端方。而文體清正者。○楊椒山遺訓曰。習舉業。切記不可一日無師傳。無師傳則無嚴憚。無稽考。雖十分用功。終是踈散。以自在故也。又必須擇好師。如一師不愜意。卽辭了另尋。不可因尋遷延。致悞學業。**廣義**按前言慎擇之功。則師友兼舉。而此言不慎擇之過。則第舉師而不及友。豈以交友之事。惟在意氣相親。自然投合。有非父之所得主歟。然亦有得而主之者。如出入往來之謹嚴。宴會聚談之覺察。邪正損益之間。誠非可以漫置而不關心也。○席嘯濱曰。三十年前。人家子弟。彼此不相往來。縱已遊

庠應舉也。只坐在家塾。足跡不離庭戶。如閨女然。非二十歲以外。不涉世。應酬。淡潛鎮靜。蚤已於此。培築根基。涉世庶不患乎身心無主。今則年方齠齔。學不窺古今。文未成帖括。便東奔西綽。結社尋盟。游談往來。酒食徵逐。子弟絕不顧其父兄。父兄亦不禁其子弟。甚者謂子弟爲人所稱數。方且津津自喜。做子弟時。便已如此敗壞。將來安得有士習。又安得有人才。

附錄

高忠憲公家訓曰。有一種俗人。如傭書作中作

媒。唱曲之類。其所知者勢利。所談者聲色。所就者酒食而已。與之綢繆。一妨人讀書之功。一消人高明之意。一浸淫漸漬。引人于不善。而不自知。所謂便辟側媚也。爲損不小。急宜警覺。

十過

童年不留心教訓

一年十過

徵事

呂榮公希哲申

國正獻公長子也。正獻公居家

簡重寡默。不以事物經心。而申國夫人性嚴。有法。雖甚愛然。教之。事事令就規矩。當齟齬時。祁寒暑雨。侍立終日。不命坐。不敢坐也。日必盛服。以見長者。天甚熱。在父母長者之側。不得去巾襪。縛袴。行步出入。惟謹。無得至茶肆酒肆。市井里巷之語。鄭衛之音。未嘗經於耳。不正之書。非禮之色。未嘗入于目也。正獻公判潁州。焦先生千之。客州守歐陽文忠公所。嚴毅方正。正獻公禮致之。令諸子從學。諸生小過差。焦先生端坐。召對。竟日。夕。不語。諸生惴惴請自改。乃小降辭色。時公年十餘歲。內則正獻公與申國夫人教誨之嚴。外則焦先生化導之篤。故德器備而學以夙成。**廣**
義程子曰。古之人。自能食能言而教之。是故大學之法。以豫爲先。蓋人之幼也。智愚未有所主。則當以格言至論。日陳于前。盈耳克腹。久自安習。若固有之者。

日復一日。雖有讒說搖惑。不能入也。若爲之不豫。及乎稍長。意慮偏好。生于內。衆口辨言。樂於外。欲其純全。不可得也。○崇修指要曰。曾子之妻。戲子以殺彘。而烹彘以實其戲。孟子之母。欺子以啖肉。而買肉以明不欺。古人養蒙之法如此。○宛陵屠公著童子禮。其引端云。易曰。蒙以養正。聖功也。而養正莫先於禮。蓋人之自失其正。以自外於聖人之途者。率以童幼之年。不聞禮教。則耳目手足。無所持循。作止語默。無所檢束。及其既長。沿習偷安。徇情任氣。如已決之水。不可隄防。已放之條。不可盤鬱。何所不至哉。是故朱子小學。必先灑掃應對之節。程子謂卽此便可達天德。信非誣也。世之父兄。旣以姑息爲恩。而爲之師者。日役役焉。以課程爲急。故一切禮教。廢閣不講。童蒙何賴焉。○朱文公感興詩曰。童蒙貴養正。遜弟乃其

方。鷄鳴咸盥櫛。問訊謹。暄涼。奉書勤播灑。擁篲周室堂。進趨極虔恭。退息常端莊。劬書劇嗜炙。見惡逾揆湯。庸言戒麤誕。時行必安詳。聖途雖云遠。發軔且勿忙。十五志於學。及時起高翔。○莊渠先生教子弟讀書法。謂初學教讀。日以文公童蒙須知。令其演習。以收放心。初授以養蒙大訓。四言五言。口誦既熟。乃授以小學近思錄四書。然後治經觀史。知識稍開。毋得教以屬對作文。散其質樸。先教之釋字直解大義。既通。乃教之演字。漸長其辭。次演一句。又次而演通章。久之。自知作文之法。凡此皆蒙以養正之助也。按此乃先賢淡心啓迪童蒙之法。欲令切實進步。雖奏功緩而得益長。不似今人之欲速助長。廢壞人材也。爲師者或知此意。然父兄未必肯憑之。卒以無濟。吾故欲以此法。遍告天下之爲父兄者。**附錄**張氏家訓曰

男女習業。當務正經。有益之事。男業之正經者。首則讀。次則耕。此本業也。其他或醫或卜。或算法。特難其精。皆足爲世用者。至若星相之事。俯仰求人。吾甚不願。子孫爲之矣。何若耕田治圃之切實可守哉。乃有爲琴棋雜藝。及一切雕鏤異巧之事。冀以餬口馳名。此治世之蠹民。聖王所必禁。我子孫有或艷心爲此者。以不孝論。女業之正經者。如蠶績紡織紉紵。以及中饋之事。乃人世所資給。室家所必需。不能者不可爲婦也。至纂組刺繡。及凡花巧之爲導人以華靡者。我所深惡。戒之禁之。尤可異者。女子而或習爲琴棋詩畫。以自標許。此大不祥之事。苟違吾訓。爲父母爲夫主者。容任之。合族得加誅斥。○王少湖曰。凡子女雖幼少。亦不可使同一處。飲食遊戲居處。不問自己親生。及婢僕。皆然。漸成褻瀆無恥。他日有不可言者。

先哲謹始慎微。至於如此。有子女者。亦當識之。

◎小事怒打重傷。

發明孟子

間不責善。蓋以責善望之師。而父子之際。貴於養恩。以全愛也。是故繼之以怒。則爲傷。爲離。可見古人之處家庭。自有中和之道存焉。其曰嚴君者。謂其體統整肅。訓率不苟。非專任威怒以爲嚴也。奈何因小事而輒至於怒打重傷也哉。其無仁愛也。深矣。其失父道也。甚矣。**附錄**曹氏家規。一日。子孫固當竭力以奉尊長。爲尊長者。亦不可挾此自尊。使性撒威。忿言穢語。使人無所容身。甚非教養之道。若其有過。又復諭戒之。甚不得已。會衆箠之。以示恥辱。一日。父母者。家人之嚴君也。切宜正其衣冠。尊其瞻視。使儼然人望而畏之。其下皆須嚴恭。祇奉。聽於無聲。視於無形。使閨門之內。有公府之嚴。方爲禮法之家。一日。古人治

家之道惟以身教爲先。爲家長者必先躬行仁義。謹守禮法以率其下。其下有不從化者。不可遽生暴怒。恐傷和氣。但當反躬自責。或傲繆彤掩戶以自撾。或傲石奮對案而不食。其下悔改。卽止不治。如果遇頑終化不省。然後責罰之。責罰不從。度不可容。陳之於官而放絕之。愚謂惟如是而乃真見其嚴。彼粗暴者不足服人。

○偏愛啓其兄弟不睦之釁。

發明 顏氏家訓曰。人之愛

子。多不能均。自古及今。弊也久矣。不知賢俊者固可賞愛。而頑魯者亦當矜憐。有偏寵者。雖欲以厚之。實所以禍之。共叔之死。母實爲之。趙王之戮。父實使之。劉表之傾宗覆族。袁紹之地裂兵亡。可爲靈龜明鑑也。○感應篇垂偏憎偏愛之戒。解之者曰。人豈無是。惟偏憎則并其是處而廢之矣。人孰無非。惟偏愛則

并其非處而掩之矣。由是言之。偏愛必流為過愛。豈特易生嫌釁。并以誤其終身。**廣義**袁氏世範曰。人有數子。飲食衣服之愛。不可不均一。長幼尊卑之體。不可不謹嚴。賢否是非之迹。不可不明辨。幼而示之以均一。則長無爭財之端。幼而責之以謹嚴。則長無悖慢之患。幼而教以是非分別。則棄取有常。而長可無為惡之患矣。

◎外人談論短失。怙已子生怨言。

發明顏光衷曰。子孫

有過。父祖多不自知。貴宦尤甚。蓋子孫放縱。多揜蔽父祖之耳目。外人知之。竊笑而已。况貴人。則進見有時。稱功誦德之。不暇。豈敢言其子孫之失。間有家訓稍嚴。而母氏猶能擁庇其子。是惟留心采訪。或庶幾焉。若怨惡人言。大非情矣。◎有過得婉諫。反加責怒。是俱遵此例。

記過發明孔子曰。父有諍子。則身不陷於不義。是則微傷戇直。亦宜改從。豈可婉諫而加以責怒乎。

五過喜一小占便宜

發明

聞鐘集曰。不求金玉富。但願

子孫賢。乃是千古卓識。蓋子孫之

賢不肖。總視父兄之教。善不善耳。今人大概以儂薄自處。并以儂薄望其子。若孫。迨其後流于匪類。宗祀傾危而莫可救。此時父兄悔之。且何及矣。○嘉言錄

云。人見子孫之愚懦者。覆宗我獨見巧而悞者。覆宗人見祖宗之厚積者。為裕後。我獨見薄取者。為裕後。

廣義

喜便宜。與甘吃虧。為反對。顧豫齋致政歸居常

呼從子正心。問之曰。兒乎。汝兩日曾學吃虧否。林退

齋臨終訓子弟曰。汝等只要學吃虧。高識之人。正有

淡心。昔奚時亨九歲。就外傳。囊白金為學貲。有婦人

道哭問之。曰。家貧鬻絲得百錢而遺之。舅姑老。無以

爲饘粥具時亨。卽以所持金予婦歸告其父。父喜曰。兒能如是。吾無憂矣。賢哉父也。嘗見人家子弟以勺米碗飯施與乞丐者流。其父母輒怒目呼叱。賢不賢相去爲何若耶。

◎傳述伯叔間惡

語不卽正家法。

發明傳述之爲害。袁氏世範言之切矣。昔富鄭公治家嚴整。子舍女僕戒

不得互相往來。誠閑家之善則。愚謂子女不等女僕往來難以禁戒。惟當于傳述嚴謹之而已。

三過有違於聖賢義理者以訓子孫

增註上條重名利輕禮義是統而論

之。彼其立教之所主。直不知有聖賢義理矣。此薄德小人所爲。若此條。不過就偶然出詞而言。或有所欣動。或有所激發。一時任意。輒以望其子孫。非必其出於由衷者。而功過格已不恕其過矣。以愚揆之。卽所

謂任意出一損德語也。已於言語條記過。是又於本
過外加記之者歟。**附錄**陳咸抗直不避近臣。其父萬
年召與語。至夜半咸睡。頭觸屏風。萬年怒曰。乃公教
汝。睡不聽何也。咸跪謝曰。具曉所言。大要教咸諂耳。
大人以直道風世。豈願聞諂佞事耶。萬年爲之動色。
勞曾三日。今之父兄教其子弟者。以圓融儇捷。善於
奔走逢迎。爲第一義。是胥天下而爲脅肩諂笑。吮
癰舐痔之人也。豈不悲哉。如陳咸者。抑又少矣。

一過 幼時容任所不當爲

一事一過**發明**顏氏家訓曰。古者聖王有胎教之法。凡庶

縱不能爾。當及嬰孩。識人顏色。知人喜怒。便加教誨。
使爲則爲。使止則止。比及數歲。可省笞罰。父母威嚴
而有慈。則子女畏慎而生孝矣。吾見世間無教而有
愛。每不能然。飲食運爲。恣其所欲。宜誠翻獎。應呵反

笑。至有識知。謂法當行。驕慢已習。方復制之。捶撻至死。而無威忿怒。日隆而增怒。逮於成長。終爲敗德。孔子曰。少成若天性。習慣如自然。是也。又曰。子之初生也。不可不使之知尊卑長幼之禮。若侮詈父母。毆擊兄姊。父母不加訶禁。反笑而獎之。彼既不辨善惡。遂謂當然。及其旣長。習已成性。乃怒而禁之。不可復制。殘忍悖逆。無所不至。此蓋父母無深識遠慮。不能防微杜漸。溺於小慈。養成其惡故也。○明道先生曰。教小兒。須示以好惡。有常如養犬者。不欲其升堂。則時其升堂而扑之。若旣扑其升堂。又復食之於堂。則使孰從。雖日撻而求其不升。不可得也。又曰。古人雖胎教。與保傅之教。猶勝今日庠序鄉黨之教。古人自幼學耳。目遊處。所見皆善。至長而不見異物。故易以成就。今人自少所見皆不善。纔能言。便習穢惡。日日消。

鑠更有甚天理。○蘇氏家語曰。孔子家兒不知罵。曾子家兒不知怒。所以然者。生而善教也。**附錄**顏光衷曰。積德與慈教並重。積於身。以裕後。實禹鈞是也。然後世未嘗不頌稱其教子義方。使子孫共爲有德。則所積綿遠矣。歷觀著姓名族。蓋必由此有父兄令儀。令範。而子弟漸以趨時。漸以放脫。此便是發酒風。再飲福不去也。然亦本少年不早教來。貧家教子誠急。富貴家教子尤須痛繩。不容輕貸。何也。彼其驕貴癡養。願指氣岸。種種已積之胸中。非嚴父良師共習追琢。未有能成大器者。○顧氏庭聞遺述云。凡家世茂盛者。多以仁厚寬恭立德。故得邀福祐於天。但處世用寬。而律家用嚴。務以已所行者。切實教訓子孫。斯可以傳業於不替。不然。自家知義理。行方便。至子弟習成性氣。願指驕人。且以老人家爲迂濶。儇捷尖巧。

爲時行如此安得不敗故洒掃應對守弟子職古人
立教之最喫緊也又云歷觀將興之家禮必可觀放
脫之彥敗不踰時大抵風俗壞時自其子弟先做壞
了好尊惡卑樂諂怒繩放縱敗檢甚者父兄只以聲
色貨利權焰威寵激其讀書志意而猶自以爲善教也一朝得志其凌厲傲慢寧有極哉

◎幼時

裁一過美衣服

徵事

袁了凡夫人爲其子儼作冬衣

將買絮公曰絲綿輕煖家中自有何必買絮夫人曰綿貴絮賤欲以貴易賤多製絮衣贈族中寒無衣者公喜曰此子壽矣後儼登進士嗟乎前輩慨論世風有曰朝廷之正賦不完且逐輕肥之習父母之養食不繼先飾純袴之兒習俗之難挽如是如袁夫人者豈易得哉

附錄

劉毗爲縣令子贊始

就學衣以青布衫襦每食則自食肉別以蔬食食贊

謂之曰食肉。君之祿也。爾欲之。則勤學以致祿。吾食非爾之食也。由是贊發憤力學。卒舉進士。○柳公綽諸子平時皆令蔬食。曰昔我兄弟侍先君爲丹州刺史。使以學業未成。不聽食肉。吾不忍忘也。○顧氏家訓曰子女自幼衣以布素。食以粗糲。不惟惜福。兼可教儉。**廣義**愚觀世俗爲子女而糜費者。大家小戶罔有不至。動云子女面上錢財何惜。而不知其費之不當。則適爲子女增業。何嘗有毫末之益於子女哉。美衣美食。冥中折福。誰人曉此。或告之以習慣性成長大可憂。溺愛者又謂未必然也。曷亦聞袁氏世範曰。人家有愛其小兒者。以金銀珠寶之屬飾其身。小人有貪者。於僻靜處壞其性命。而取其物。雖聞於官。置於法。何益。衣服過美之爲禍。至此又嘗見醫書曰。凡小兒皆陽氣有餘。陰氣不足。故多患驚風痰熱之疾。若

父母恣其食肉及諸厚味必助火益陽消竭陰氣鮮不爲患。其有痘方出而發紫泡以死者何哉。正以厚味積熱觸其相火故耳。飲食過美之爲禍至此。觀此兩說則知誠愛其子女者安可無遠慮耶。功過格白文但舉衣服愚謂飲食必當兼言且尤要緊。至當婚嫁之時只須稱情盡禮繁華過費皆爲傷財造業更可唾者始落地時便侈張其事不惜盛費以爲厚待子女甚至廣殺生命結綵笙歌獻神宴客人奔走而疲勞物衆多以腐敗所爲惜福延壽者安在哉。善乎陳氏家規曰子女初生三朝滿月以及週歲各有俗習靡費無謂慎勿效尤舉行惟滿月後當齋沐更衣具酒菓抱子告於祠堂其世俗催生送羹之禮概宜謝絕。老成高見宜其遵之。是雖功過格論過所不及以類而推不得恕也。◎見不善不卽

教誨

徵事

司馬溫公五六歲時弄胡桃女兄欲為脫

其皮不得女兄去一婢以湯脫之女兄還問誰

與脫者公曰自脫耳父和中公適見之訶曰小子何

得誑語本溫公誠至無妄語父教使然也○沈進士

泓字臨秋生五月而孤母宋氏於紡織之下親授之

詩書家常乏食公七八歲時出行郊野見兒童競拾

穀穗亦取一粳以歸母怒曰非分之物喜為已有烏

可不絕其萌責令跪父靈前杖以懲其後臨秋公於

母亡之後常

垂淚道之

◎見小過不從容訓戒恣意打罵◎本

無過失任意呼叱

◎因他怒過責

發明

以上三條皆

暴父之為惟任已

意而不顧於傷其子者是豈僅責善之謂哉其必至
於大不祥而後已細讀孟子文因博觀於今人父子

之際。固知功過格連詞不已。用意深切也。**附錄**徐尚

公曰。聖賢之教。要在各盡其道。而不以相責。如爲子言。則曰。父雖不慈。子不可以不孝。此一說也。爲父言。則曰。有慈父。然後有孝子。此又一說也。子有子道。之當盡。父亦有父道。之當盡。非謂但當責子之孝。而爲父者。竟可聽其自恣爲也。家庭禍惡。必有所以啓之者。至於父子相責。不成禮體。子固不容。違其罪矣。有識之君子。豈獨罪其子哉。◎切望子孫

以儉勤敬謹。未嘗身爲一味嚴督。致生其腹誹。一過

發明世人之教子者。大都德行非其所先。惡其不勤。不能向上。惡其不儉。不能成家。惡其不敬謹。不能小心用命。此固人情之大常。而亦聖賢之所無惡也。然必躬行率先。加以獎勸。乃獲教訓之效。不能是。而徒

嚴加督責。子孫而賢則已。子孫不賢。未有不重傷父子之情者。功過格所以淡繩之歟。**增註**此與已身縱逸無以垂範。又別上惡其規型不立。此惡其不恕傷情也。◎失教於前。苛責於後。

傷父子情

一日一過

發明

袁氏世範曰。人之有子。多

於嬰孩之時。愛忘其醜。恣其所為。無故叫

號。不知禁止。而以罪保母。凌轢同輩。不知戒約。而以咎他人。或言其不然。則曰小未可責。日漸月積。養成其惡。此父母曲愛之過也。及其年齒漸長。愛心日踈。微有疵失。遂成憎怒。撫其細故。指為大惡。或遇親故。歷歷陳數。斷然加以不孝之名。而其子實無他罪。此父母妄憎之過也。故子幼必待以嚴。子壯無薄其愛。庶幾初終可守。慈孝兩得矣。**廣義**連讀白文旁註。是統論其生平。則袁氏之發明誠透徹矣。愚意亦可分

就一事一節言之。爲父而誠盡心教子。則隨事皆訓導所預及。而臨事命之又必諄切叮囑。斯奉命者無不能之患。而且無不謹之憂矣。假令父之命子。忽然而命以所不習。又慢然無所指導。雖賢者亦將失措於一時。而愚鈍者流。益難責望矣。乃不諒其情。輒發詈罵。甚則鞭撻隨之。不幾大違於仁慈兩字哉。失教之過。屢見篇中。此條白文之義。則主重於苛責。所謂嚴不中道。近於暴虐者也。於一事一節而犯此者甚多。如袁氏之言。則爲一日一過。參以愚意。尚當補曰。一事一過。兩存其義。斯記過條例詳明而無漏耳。

◎進一善言。任已意不肯聽從。

凡待卑幼。俱照此例。

發明

卑幼之進善言

必有一番誠愛之心。忽其言而不聽。不特虐下之情。且以滋已之過。故與不聽尊長同記過云。○按旁註

則凡親友之卑行幼年者。以及婢僕。皆統之矣。戚南塘曰。攻爾過者。爾師也。屬下人能陳爾過。卽不能師之。以禮亦必。師之以心。

親友盡倫之六。○再從伯叔。再從兄弟。及母之從兄弟。俱參此條。**總論**親以情聯。友以義合。篤

於情者。必不忘親。重於義者。必不負友。古所謂睦婣任卹之事。全在此條。斯固惇倫之所必及者也。

○親統同姓異姓。卽俗稱三黨之戚者是。先父族。次母族。次妻族。推之。又有子女之姻屬。準其倫叙。

量其情誼。力所能者。勿靳。事之迫者。必周。習俗澆薄。古道猶存。惟在賢者之自盡也。○友非僅泛然

交往相識之謂也。必其親愛之情。如兄弟。切磋之益。同師生。疾病相卹。患難相救。德業相勸。過失相

規同心斷金之交。終其身原無幾人。是蓋關係於
五常百行者。匪淺也。此倫至於今而幾廢。善乎朱
夫子之言曰。朋友者。天屬之所賴以正者也。必欲
君臣父子兄弟夫婦之間。交盡其道而無悖。非有
朋友以責其善。輔其仁。孰能使然。此古聖修道立
教。所以必重乎此。而不敢忽也。勉齋黃氏曰。天叙
有典。君臣父子夫婦長幼一失其叙。則天典不立。
人道化爲異物。朋友道絕。則四者雖欲各居其分。
不可得也。然則朋友雖列人倫之後。而所以紀綱
人倫者。也可重若此。世莫重焉。可不爲之屢嘆也
耶。兩先生之言如是。甚矣友道之非苟也。而豈等
諸泛泛者乎。雖然。往來相識之流。同焉稱朋友者。
則亦有之矣。昌黎云。或以事同。或以藝取。或慕其
一善。或以其久故。或初不甚知。而與之已密。其後

無大惡。因不復決捨。或其人雖不皆入於善。而於已已厚。雖欲悔之不能。愚意凡若此者。皆當視其人。以爲情誼之差等。有逾於至戚者。有視疎遠之親而猶稍殺者。隆殺之間。惟稱情而施可也。乃其要道。則尤有二語。曰慎而擇之。久而敬之。所以全交者。不可不牢記也。**附錄**諸晉三曰。人於倫常。無一倫可以忘情。然而貴審親疎之序。註感應篇者。其解背親向疎句云。或視父母之親如泛常。而待妻黨則如膠漆。或處兄弟。錙銖必較。而處朋友外人。則慷慨近情。或本族貧寒不相顧。而冒認他宗。趨炎附勢。如此之類。雖日用其愛敬。皆是爲惡。不可爲善。其說最爲精微。受持功過格。亦須悟此理。○徐松岑曰。朋友非親也。以義合。賢則友之。不賢者不友也。雖然。亦有之。或師之子。或父執之子。雖

不賢其可棄乎。此不忘故舊之義。非所論於友賢者也。上德雖友亦師。不以齒較。則賢賢有等矣。人之不爲我友者。則塗人也。塗人先鄉鄰。由近以及遠。由所知以及所未知。雖無可愛。然君子慈憫之。雖無可敬。然君子曲成之。義也。舉其重。周其急。因時而制焉。可矣。○又曰。等事也。其在親賢爲重且急者。在疎愚則爲輕且緩。此義之當。情之常也。亦有權焉。兄弟之讌會。不重於宗族之婚喪。朋友之餽遺。不急於塗人之凍餒。此情之變。亦義之常也。由此而推廣之。其制事當無所失矣。

一功 偶有急需。弗吝緩急。不計利。聽其隨便送還。五十錢一功。

徵事

楊州興化韓樂

吾家素貧。適歲饑。典當俱盡。一日止餘米二升五合。有同社友絕糧欲分半以贈。妻曰。如明日何。樂吾目。

我等是明日死。彼却是今日死。遂分贈之。此乃爲人所難爲者。而易爲者可知矣。敬錄之以爲法。◎

貧乏借貸。明知其不還。隨多寡以應之。不加厭惡。

百錢

一功。

發明

袁氏世範曰。凡親戚有假貸者。不如隨力

給與之。言借。則我終望其還。不免有所索。索之既頻。

必反怒曰。我欲償之。以其不當頻索。則姑已之。方其

不索。則又曰。彼不下氣問我。我何爲而強還之。故索

亦不償。不索亦不償。終於交怨而後已。且貧人之假

貸。初無肯償之意。縱有肯償之意。亦何由得償。或假

貸作經營。又以命窮計拙而折閱。方其始借之時。禮

甚恭。言甚遜。其感恩之心。可指日以爲誓。至他日責

償之時。恨不以兵刃相加。俗謂不孝。怨父母。欠債怨

財主。不若念其貧。隨我力之厚薄。舉以與之。則我無

責償之念。彼亦無憾於我。縱不滿其欲而怨亦不至。如責償時之甚也。按功過格所訓。是行善之實心。袁氏所言。并爲處世之良法。有財勢者。其加意焉。○弔慰誠敬發明陳用揚曰。子於是日哭。則不歌。檀弓曰。弔於人。是日不樂。又曰。行弔之日。不飲酒。食肉焉。夫自朝至於日中昃。謂之日。弔日不歌不樂。不飲酒。食肉。則一日七情。惟哀爲易感而難化。誠敬之至故也。故未弔哭而已。哀不歌不樂。不飲酒。食肉。旣弔哭而猶哀。不歌不樂。不飲酒。食肉。故曰。君子哀樂不同日。以全哀也。○近思錄云。程子葬父。周恭叔主客。客欲酒。恭叔以告。先生曰。勿陷人於惡。苟弔喪而不誠。得毋犯程子之謂惡歟。廣義呂和叔弔說曰。詩云。凡民有喪。匍匐救之。不謂死者可救而復生。謂生者或不救而死也。夫孝子之喪親。不能食者三

日。其哭不絕聲。既病矣。杖而後起。問而後言。其惻怛之心。痛疾之意。不欲生。則思慮所及。雖有大事。有不能周之者。而況於他哉。故親戚僚友鄉黨。聞之而往者。不徒弔哭而已。莫不爲之致力焉。始則贈含。祔以周其急。三日。則供糜粥以扶其羸。每奠則執其禮。將葬。則助其事。其從柩也。少者執紼。長者專進止。其掩壙也。壯者盈坎。老者從反哭。祖而贈焉。不足則贈焉。不足則賻焉。凡有事則相焉。斯可謂能救之矣。故適有喪者之辭。不曰願見而曰比。雖國君之臨。亦曰寡君承事。他國之使者。曰寡君使某。毋敢視賓客。主人見賓。不以尊卑貴賤。莫不拜之。明所以謝之。且自別於常主也。賓見主人。無有答其拜者。明所以助之。且自別於常賓也。自先王之禮壞。後世雖傳其名數。而行之者多失其義。喪主之待賓也。如常主。喪賓之見

主人也。如常賓。如常賓。故止於弔哭。而莫敢與其事。如常主。故舍其哀。而為衣服飲食以奉之。其甚者。至於損奉終之禮。以謝賓之勤。廢弔哀之儀。以寬主之費。先王之禮意。不盡失乎。

三功遇貧乏親交吉凶事。加厚盡禮。無計報心。◎歲時

饋問。留意周給貧乏者。

明待一人為三功。所費另記。**發**周給窮親之道。如范文正

義田。誠盡善矣。然非大有力人。未易辦此。若功過格。此條與上文一條。即稍稍有餘者。皆可能之。視其力量。無有定則。而仍有定則之可循。蓋平居無事之時。既不能日以賙之。則當因事而施。吉凶慶弔。不止具文。務隆其實惠焉。而又必於歲時伏臘。假往來饋問之常。厚為周賙。施之有文。予人以可受。出之有節。予

已。以可常。愚於此而深歎功過格之訓示於人者。何其切至也。

五功

親友有事爲之盡心出力不憚勞苦。

一小事爲五功。利其飲食

者非。

徵事

楊榮從文皇北征。與胡廣金純金。幼孜迷

失道入窮谷中。幼孜墮馬。胡金二公不顧而去。公下

馬爲整鞍轡。不數步。幼孜復墮馬。鞍盡裂。公卽以所

乘馬讓之。自乘驕馬。從夜至旦。不勝其疲。翼日謁上。

幼孜備奏上嘉公之義。公謝曰。僚友之分。誼所宜然。

上曰。廣純獨非友也。乃不顧而去也。二公聞之。惶愧

無

地。

十功

忠厚自盡。不介意於小嫌。○款留貧困親朋。解衣

推食。彌月無厭憎心。

一日一功外。加記十功。

三十功

親友有事出外。不負一重託。

增註

如教子讀書。

門戶大事。仗留心。

衣食有闕。仗緩急。既受托後。時時問候。無敢忽畧。若出財周濟。不必其還。另論錢記功。

徵事

朱暉南陽宛

人。與張堪同縣。堪於大學中見暉。接以友道。把其臂曰。欲以妻子託生。朱以堪先達。不敢對。自後不復相見。張亡後。朱聞其妻子貧困。自往候視。分居食給之。暉子怪問曰。大人不與張君為友。何忽如此。暉曰。張君嘗有知己之言。吾以信於心也。嗟乎。朱暉之德。固不待言。張堪之識。洵為巨眼。錄此。并以告托友者。不可不慎。

○扶持一篤疾危病獲痊。

出錢醫禱。另計費。論功。親身奉侍者。

另又計日論功。**徵事**吳廷舉平生篤友誼，遊太學時

與羅玘交，會玘病痢，從者亦死，公爲煮粥餉之，負之登廁。一晝夜十數返，不爲勞。玘語人曰：「玘四十年生我者父母，四十年後生我者吳公也。」後同登進士。

◎爲貧不能葬者葬一柩，爲貧不能娶者完一婚。計

論功外，另加三十功。**徵事**休甯查道，淳化中赴試，貧

不能往，親友湊銀錢贈之。偶過父友呂翁家，翁喪，貧

無以葬，將賣女以襄事。公傾囊與之，且爲其女擇壻。

是歲不赴試。又故人卒，其女賣人爲婢，公多方設法

贖之，以嫁士人。次年卽登第，居官止蔬食，後享壽百

餘，無疾而逝。○劉岑守維揚，有故人子以父未葬爲

請，詰以所費幾何。子歷歷具陳。岑曰：「且留相伴，密使

幹吏齎金往辦之。」兩月吏回，始與說曰：「喪已舉矣。」子

可速歸。岑語人曰。此子氣太爽。得錢必不以親為重。不若留此而畢其事。先友之志酬矣。

五十功

接待前輩無一失禮。

增註謂父母妻三族尊行。或班行稱呼而年長以倍

者。及父之執友。皆為前輩。須息心內返。無少愧。乃得記功。

百功

遇一可救急難。盡心力以救之。得免不取酬。無德

色。

◎加意尊敬有齒德者。誠心領納教益。

增註須有善必做。有

言必遵。乃為誠心領納。下句似應兼同輩在內。亦指終身而言之者。少有忽畧。抱愧便難記功。◎年

老無依者。矜憐供養。終始無倦怠。

一日一功外。加記百功。強以任勞者。

不得記功。

徵事

杜環金陵人。父一元與常允恭善。後

恭以兵部主事死九江。其母張年六十餘無所歸。往依安慶守譚敬敬。恭友也。拒之。張大困。展轉至金陵。訪一元而一元死矣。子環納之。呼妻子出拜。解衣進食。設寢處。殊備。時兵後歲荒。民骨肉不相保。母見環貧。辭去。訪他故人。環遣婢從之。無一遇者。復反。自環以下。皆以母事之。張性褊急。少不愜。輒詬怒。環私戒家人。事之益恭。張善病。環親爲調藥。如是十年。環以贅禮郎祠會稽。遇其幼子伯章。語以母狀。章謾曰。吾亦知之。顧道遠不能至耳。環歸半歲。伯章始至。是日環誕辰。母子相持大哭。家人以爲不祥。止之。環曰。此人情也。何不祥之有。已而伯章竟給以他事辭去。不復顧。環奉張彌謹。然張以念伯章故。疾頓加。臨卒。舉手向環曰。吾累杜君。吾累杜君。願杜君子孫咸如杜

君環為殯葬如禮。歲時祭於墓。環歷官太常。後嗣繁衍。稱德門云。

三百功

貧乏遺孤為之撫養成立。不異已生。

增註亦當參子女條

仁慈一體盡心訓導。一日一功。此三百功則又特記之者。**徵事**錢塘文學張石生與蕭山學博潘驚秋同窓砥礪相得甚懽。一日潘病篤。惟一子兆珪寄托無人。長嘆久之。亟請石生語以故。張首肯。迨潘卒。張悉代理家務。喪葬畢。即率潘子歸家。教養與已子無二。兆珪苦讀成進士。事繼父如親父焉。

百過

遇一急難求救可救不救。

附錄范鼎字文鉉。文正公後生。平練衣糲食。遇

人有患難。必盡力為拯援。尤苟不逮。則終日為鬱鬱。肯急人者。豈非肝腸自別歟。

◎見有不

幸流落或貧病無依者能顧不顧

發明

陳思進謂顧

益卿曰我輩登第

之日宗戚交遊無不喜動顏色使今日不能稍爲之地則曩日之喜亦何爲哉此真長者之言謹按是格

不止爲縉紳垂戒即未嘗富貴力有可爲便不宜忍

心坐視也

徵事

程明道述侯無可之行曰無可嘗自

遠方歸甫至家友人郭衡者詣門言父病亟醫須百

千乃爲治賣吾廬而不售傷哉貧也無可立解橐中

裝與之詣京師還鄉人有病於逆旅而憊者無可惻

然留視療之病者愈貧無車輟已馬載焉徒步歸家

無擔石而人有急必以之爲歸非力能也誠使然也

附錄

彭澤王氏宗講約曰族人聚會時必問族中鰥

寡疾苦以相賙恤尚書稱文王惠鮮鰥寡鮮字最妙

謂鰥寡之人垂首喪氣賚予周給之使之有生意夫

國於鰥寡。尚留其生意。況同宗一氣相屬者乎。今人酒肉饋遺。每施於外親近鄰。家溫能還報之人。卽往來不厭其頻。而族中鰥寡。曾不一念及之。甌裏塵生。門前草長。或鳩杖而倚門間。或鷄骨而支床第。淒風苦雨。舉目蕭條。長日窮年。無人倣傚。縱同門共巷。尚且置若罔聞。何況住居相隔者乎。偶經道過門。亦必佯爲不知。更無特地相問者。惟俟其死。一假哭胡拜之。曰。予爲族誼也。族誼果如是乎。

五十過

摘發一陰私

增註

言語條摘發一人陰私下尚

有旁註宜叅之

徵事

王狀元華居

官時。人以他事誣之。或勸之辨白。曰。此我同年友事。若白之。是我誣友也。竟不辨。後陽明官京師。聞士論猶爲此事紛紛。陽明不平。欲具疏奏辨。公馳書止之。曰。汝以是爲吾耻乎。吾本無可耻。今乃無故而攻發。

其友是反爲吾一大耻矣。人謂汝智

於吾。吾不信也。于是遂止不復辨。

◎負一許諾重

託。

徵事

宋京德爲人忠信不欺。有友病篤。慮子不肖。

密以千金付之。曰：我死，此子必蕩費無餘。俟其將餓死時，然後與之。後其子果如父言，勸之不從。窮苦至極，德見其有悔恨意，始召而詰曰：爾父有產之家，何以至此？其子慚而不答。德曰：我有微物惠汝，恐汝又費於歌酒也。其子指天誓曰：若果負君，當得惡死。德卽取其父所遺之金與之，封記如舊。其子泣曰：吾父死時，但云善事。京公不意今日獲此，足徵死生不變之德也。其子改過修善，節儉自守，竟成完人。德卽京三郎也。

十過

相與無誠心。一味虛文諂媚。

待一人爲十過。**發明**程子曰：人之於朋友。

修身誠意以待之。疎戚在人而已。不巧言令色。曲從苟合。以求人之與已也。雖鄉黨親戚亦然。**附錄** 鞠詠爲進士。以文受知於王公。化基及王公知杭州。詠擢第。釋褐授仁和縣將之官。先修書并作詩寄王公。以謝平昔獎進。今復爲屬官。得以文字相樂之意。王公不答。及至任。畧不加禮。課其職事甚急。鞠大失望。於是不復冀其相知。而專修吏幹矣。其後王公入爲參知政事。首以詠薦。人或問其故。答曰。鞠詠之才。不患不奮。所憂者。氣俊而驕。我故抑之以成其德耳。鞠聞知始以王公爲真相知也。◎訴婢僕獲

罪漫不爲理。◎藏一怨不忘。◎死後責備過失。

發明 凡親

友待已過失。能忍耐。固爲功。卽不然。亦必當面責備。使其知改。若其人旣死。而猶責之無已。君子所深爲

痛心者也。

五過 背後談論前輩及至交過惡。

發明 凡待外人。皆面當責備。心存廻護。况

其在倫常乎。**附錄** 黃陶菴先生吾師錄云。北齊崔暹好薦人士。言邢邵宜親重。言論之際。邵遂毀暹。文襄不悅。謂暹曰。卿說子才長。子才專言卿短。此癡人也。暹曰。子才言暹短。暹說子才長。皆是實事。不為癡也。宋盧多遜與李昉相善。昉待之不疑。多遜知政。多毀昉。人以告昉。昉不信之。後太宗語及多遜事。昉頗為解釋。太宗曰。多遜毀卿一錢不直。昉始信之。太宗由是目昉為善人。夫人非聖人。自無每事盡善之理。吾業與之親暱。則長善。救失與有責焉。不能匡正。乃從而訾訐之。以自為直。可乎。先儒謂無口過易。無身過

難。無身過易。無心過難。夫其易者且不能。况難者乎。故君子不談人過。一以養德。一以遠怨。雖他人有談

者。正容以止之。可也。◎於飲食饋問上發一誚責語。增註按交

微薄之過。嫌止就意念言。此則其又加之者。發明張

子韶先生每遇相識惠物小則喜而受之多則憂而

却之。愛已愛人均有淡

心。鄙夫俗見難與曉矣。◎不以德義相愛徇私情失

公道。徵事王忠肅公當典選時外孫賴某欲得給事

中。祈夫人言之。後選縣令。缺望不已。夫人咎公

曰。身為冢宰。不能庇一外孫也。公正色曰。婦人安知

大計。賴生年少登第為長令。於分過矣。如肯留心民

事。我位可到。何榮一給事乎。○章拯楓山先生姪也

官至司空。清操淳樸。與楓山等致政歸。有俸餘四五

百金。楓山知之。大不樂。曰。汝此行。做一場買賣。回大有生息。拯有慚色。**增註**嘗見論過者。有味心黨護所私之條。似亦可貫於此條矣。就此條中。舉其端緒。殊難盡析。有粗顯者。有極其深細者。以平人而誦持功過格。只須就粗顯者戒之。如昧心黨護所私之類是也。若以君子言之。窮理不致十分透徹。便不能無犯焉。昔高子曾論顏淵死。門人欲厚葬之。其厚同列之意甚美。夫子何以淡嗟。重慨曰。非我也。夫二三子也。子疾病。子路使門人爲臣。其尊師之意甚美。夫子何以嚴詞切貶曰。行詐曰。欺天。又曾子易簀時言曰。君子之愛人也以德。細人之愛人也以姑息。此義豈易爲尋常人言乎。讀書窮理者。當淡心體之。自知功過格此條。其旨

意難窮也。

◎接待禮文以貧富異情。

徵事

主父偃

拜齊相。徧召

昆弟賓客散五百金與之數曰始我貧時昆弟不我衣食賓客不我納門今爲相諸君迎我或千里外我與諸君絕矣偃固不足道然世之以貧富異情者可以鑒矣○皇甫謐有從姑子梁柳爲城陽太守將之官或勸士安餞之士安曰柳爲布衣時過我我送迎不出門食不過鹽菜今送之是貴城陽太守而輕梁柳非心所安也

三過無損於已有益親友事假託規避

徵事

晉荀巨伯

遠省友人疾值

賊攻郡其家人悉奔竄友泣語巨伯曰吾分必死子可去巨伯曰遠來相視子令我去敗義以求生豈荀巨伯所行者賊至執之曰大軍至一郡盡空汝何男子敢獨居此巨伯曰友人疾不忍委之願以身代友

之命。賊曰：吾輩無義而殺有義，不可。遂解去。狄梁公爲并州法曹時，與鄭崇善同僚。鄭當使絕域，公曰：彼毋老且病，豈可使有萬里之行？詣長史蘭仁基請代。之仁基素與司馬李孝廉不協，因相謂曰：我輩豈可不自愧乎？遂相與輯睦。觀此，知古人之重交誼者，苟可以盡其情，雖患難艱險，有所不避，況其爲無損於已者乎？

◎正經親友索晤詭託他出

遠來不接者，加二倍。若待比險之人。

免過徵事

湛甘泉先生有來謁者，無論相識與不相

識，必整衣冠延入，嚴諭門僕，不許妄回一人。苟必不可見者，則婉辭之。年八十餘，每遊屐所至，訪高士名儒，孜孜談道，無倦容。其肅賓好賢之誠如此。勞曾三曰：今之士大夫，尊已而卑人者，比比矣。昔有一士謁見貴人，吏報曰：方寢，士作詩曰：公相乘閒卧絳厨。白

衣老吏慢寒儒。不知夢見周公否。
曾說當年吐哺無。此詩可稱絕倒。

◎待前輩至交爽

一然諾

徵事

羅道琮貞觀末徙嶺南同徙一友人死

荆襄間臨歿泣曰人生有死我獨委骨異壤

乎道琮曰我若得還不使君獨留瘞路左去歲餘遇

赦歸方霖潦失殯處道琮慟諸野沸忽起波中道琮

曰屍在可再沸水復沸乃得屍還中路宿旅店彷彿

見友謝曰君德死生不易名位將不止此也尋擢明

經知名

◎一小嫌介意

徵事

程正公放歸田尋編管

當世

涪州謝良佐曰聞之是行也

乃族子公孫與門人邢恕爲之耳先生曰族子至愚
不足責故人情厚不敢疑孟子既知天安用尤臧氏

◎失一弔慰

若係五服內之親及至交喪亡不弔者
加十倍論過

附錄

張仲嘉輯齊家寶要

特載一段曰。梁范雲少與領軍長史王咳善。雲起宅新成。移家始畢。咳亡於官舍。屍無所歸。雲以東箱給之。移屍自外入。躬自營舍。招復如禮。時人以為難。蓋俗禁冷屍入舍。以為不祥久矣。况師友之間。情謝天倫乎。元周仁榮嘗築一室。纔落成。友人楊公道輿疾造門。曰。願假君新宅以死。仁榮讓正寢居之。俄而楊死。篋中有遺金數錠。莫有知者。楊弟詣仁榮求分之。仁榮曰。賢兄寄死於我。意固在是。喪之費。我自任之。終不敢利其一毫。乃對衆封籍。自平陽呼其子來。悉付之。顧潤之者。嘗從俞觀光先生學。先生無子。嘗語人曰。吾昔寢疾於杭。潤之侍湯藥。情同父子。醫為之感動。弗忍受金。我行且老。必托之以死。後訪醫吳中。疾革。趨舟歸潤之。次尹山而卒。明日至樵李。潤之奉其屍殮於家。衰經就位。士人為潤之來者。潤之拜之。

明年葬於海鹽。近顧氏先塋。歲時祭享惟謹。或問殮於家禮歟。潤之曰。吾聞師哭諸寢。又曰。生於我乎館。死於我乎殯。非我殮之。則將尸諸草莽。生服其訓。死而委諸草莽。仁者弗爲也。聞者嘆服。嗚呼。一死一生。乃見交情。今天下朋友道喪久矣。此三事足以醒頽俗。故叢而著之。愚摘錄於此。見死生之際。必不可恕。置於情而苟弔。慰有失。則其待親友將何所不薄耶。

一過 見前輩褻狎不敬。

發明周海門曰。三族之親。人共知之。而禮所當守。一毫不可踰。

越本族無論矣。母族稱舅者。卽母之兄弟。雖疎遠之極。亦當侍坐。予郡邑皆然。而他處有不然者。非也。妻族之禮。曾見孔叢子曰。妻之父母。爲外舅姑。拜之可知。妻之諸父。則以親配。德年以上。拜之可也。幼於已。

者。揖之可也。此出於人情而可常者也。今之人能盡知此禮乎。昔陳涉爲王妻之父母。往焉。涉以衆賓待之。長揖不拜。無加其禮。妻父怒曰。怙亂僭號。而傲長者。不能久矣。不辭而去。涉隨滅亡。禮之不可忽如此。姑夫之親。似在三族之外。然姑者。父之姊妹也。姑之夫。卽與伯叔等。雖疎遠。亦難並行並坐。吾嘗見陶石簣官至祭酒尊矣。而見疎遠之姑夫。行不並行。坐必待坐。或強之少假。決不肯。觀此可以作則矣。○沈文端公文雅社約曰。古人於父執至嚴。有坐受八拜者。嘉靖年間。予親見新進朋友。尚不敢與前輩齊肩。相見則稱曰齋長。或與服勞役之事。不以爲詘。今俗其有是否耶。顧此義在論語鄉黨篇。恂恂如也。似不能言者兩句內。可佩之終身有餘矣。今與諸公約。凡在本族尊輩前。雖仕宦。不得据上坐。遇父執。及相知高

年者。必以容執。綏必下。其餘亦各以情義輕重。自執恭謹。禮云敬老。為其近於父也。敬長。為其近於兄也。我敬我父兄。成我孝弟。亦何誦之有。◎與前輩交接。加一爾汝稱。◎善

言相勸不肯聽。

徵事包孝肅內剛不屈。面折人非。世稱關節不到。有閻羅包老。至於所言。

中理。又怡然。而受龐穎公為七閩轉運使。凡僚屬有所關白。苟利於民。即文書已行。必追改之。語云從善如流。我輩當以二公為法。◎見過可規不規。◎借物不應。**徵事**王昭素為

宋祖所徵。禮遇特厚。其居鄉也。躬行以導鄉人。一鄉感化其德。家有一驢。必先問外無借驢者。而後乘之。以出借物不應者視。◎遇貧親友吉慶事情禮闕略。此宜何如自愧耶。

◎富貴厭惡貧親友往來

一念一過。若其人無道虧行而厭惡之。不在此例。**增**

註

須看旁註。只指念言。若果拒絕之。則犯能顧不顧

之條矣。

發明

胡振安曰。景行錄有云。富貴之家。常有

窮親戚往來。便是忠厚。今人以貧賤親戚。常上富貴

之門。則為削色。為不祥。余以為此正有光吉祥之事。

所謂大將軍有揖客。顧不重耶。

徵事

羅惟德任甯國

時。一日謁劉寅。喜動顏色。曰。今日一大愉快事。寅問

何事。曰。近貧宗有十數人。以饑荒遠來乞周。比積俸

餘。施散待盡。家大人以下。及諸眷屬。無阻撓我者。為

是。

然耳。◎待遠客以不能具肉不留。

增註

蘋蘩蘊藻。亦

可肅賓。務盡已之

情耳。倘親友不諒。則彼為過。我不留。則我為過矣。若

自奉常具肉食。故以腐飯肅賓。應加五倍論。**附錄**宋

太宗朝張泌爲中館家多食客一日太宗問曰卿何
食客之多也泌曰臣親舊多客郡下貧乏絕糧臣俸
有餘常過臣飯亦不過菜羹已耳一日上遣人伺其
食時突入取客食而去果粗飯菜羹上嘉其不欺時
號爲張菜羹○董公朴成進士後差過岳州聞劉忠
宣宅憂在里造謁焉忠宣留之飯飯麥糲饌惟糟蝦
一器朴感省終身持雅操視昔胡紘噉朱文公
無隻鷄斗酒之供釀成僞學之禁相去何如哉○飾

情虛留實喜其去○累月不會晤不一念

徵事山陽范巨卿式

少遊太學與汝南張元伯邵爲友二人並告歸鄉里
式謂元伯曰後二年當還將過拜尊親見孺子焉乃
共尅期日元期元伯具以白母請設饌候之母曰二
年之別千里結言爾何信之審耶對曰巨卿信士必

不違也已。而式果至。登堂拜母。盡歡而別。後元伯寢疾篤。同郡郅君章殷子徵晨夜往省之。臨盡而嘆曰。恨不見我死友。子徵曰。吾與君章盡心於子。是非死友。復欲誰求。元伯曰。若二子者。吾生友耳。山陽范巨卿。所謂死友也。時式爲郡功曹。忽夢見元伯立冕垂纓。屣履而呼曰。巨卿。吾以其日死。當以爾時葬。永歸黃泉。子未吾忘。豈能相及。式寤悲嘆泣下。具告太守。請往奔喪。太守雖心不信。而重違其情。許之。式便服朋友之服。投其葬日。馳往赴之。未到而喪已發引。既至壙。將窆而柩不肯進。其母撫之曰。元伯豈有望耶。遂停柩移時。乃見有素車白馬號哭而來。其母望之曰。是必范巨卿也。巨卿既至。叩喪言曰。行矣。元伯死。生異路。永從此辭。會葬者千人。咸爲揮淚。式因執紼引柩。於是乃前。式遂留冢次。爲修墳樹。然後去。如斯。

者。真所謂身遠而情親也。契濶無念。何云友誼乎。**廣**
義程伊川先生曰。凡人家法。須月爲一會。以合族。古
人有花樹韋家宗會法。可取也。每有族人遠來。亦一
爲之。吉凶嫁娶之類。更須相與爲禮。使骨肉之意常
相通。骨肉日疎者。只爲不相見。情不相接爾。湖廣劉
漫塘。每月朔。治湯餅。會族人曰。今日會飲。善相勸。過
相規。或有事牴牾者。彼此一見。自相忘於盃酒間耳。
故其族人累世敦睦。○黃勉齋先生集有代仲兄會
表兄弟序曰。吾從母昆弟。皆葉出也。葉氏昆弟。猶吾
從母之昆弟也。凡三姓四家。雖所系不同。自吾外祖
父以來。一本而已。先王制禮。列之五服之次。以爲總
麻之戚焉。古之總麻。非今之所謂總麻也。其歲月必
相往來。吉凶必相慶弔。出入必相餞勞。禍患必相賙
恤。亦其理宜也。世降俗末。利害交攻。一室之內。同姓

之中。尚有爭毫末。相鬪鬩者。況於異居別族之親乎。吾故昆弟散而居於城之東西南者。有累十數年而不相見者焉。邂逅相遇。問起居外。僅能貌相勞苦而已。漠然無情矣。至於諸姒諸子。則有終身而不識面者焉。吉凶禍患之來。而能爲之同其苦樂者。亦罕矣。嗚呼。此豈人道之所可安也哉。吾嘗記爲童子時。外祖父母皆無恙。諸表兄弟聚集。相與握手終日。談諧笑語。市棗栗相啖。迨其去。則流連不忍捨。旦暮又思之。而幸其復來也。豈非秉彝良心。有不能自己者。及其長也。而怵於習俗。迫於利害。而不能以相保。此有識者之所當慨念也。今吾欲與兄弟約。歲爲期日。會於天甯之浮圖。天甯去城南十里。於吾三姓兄弟之往來。道里適均。人具酒食。相告語。以孝弟忠信。相問勞。以老少安否。家計有無。至於農圃桑麻之業。皆可。

抵掌而劇談也。世俗俚下之詞。閨閨米鹽之賤。則謹勿泄諸其口。晨而往。戴星而歸。於是重親戚。大風教其不善歟。

以下專主宗親

一功敬尊長睦同輩貴賤平等

逐次記功發明張一棟曰同宗一本之義雖甚

疎遠宜講敦睦會晤勿疎休戚與共豈惟理所固然實亦情不容已古道淪喪浮俗澆漓往往於有勢力者則日趨其門親近如炎貧而賤者則畧無相卹冷淡如冰薄惡之風吾輩宜深戒之凡於宗族不分貧富貴賤歲時必登拜其門其相見之時尊卑自有定禮尊者毋過爲俯屈卑者勿稍有驕恃其途間相遇

必拱立道旁。急趨而揖。有問則對。無問則俟尊長行後而後行。其冠婚喪祭之期。必躬自致請。使之必聞。或有喪不能舉。婚不能娶。俯仰無賴者。量力助之。其有遺棄孤幼。尤所當念。必使之得所。至於母黨妻黨亦然。但施有序而惠及有等也。

二十功 富時結親。不以貧時異念。婚嫁惟盡已情。無憎

心。無過責。

徵事 姚雄初為將。以女議定一寨主之子。後遷官他所。連陞為大帥。訪知寨主久病。

故。妻子流落不可問。適赴闕奏計還。遇一嫗浣衣。見其有士人家風。問之。嫗曰。良人某守官邊寨。今夫既喪。母子無以自存。方貨餅餌以自給。問其子有室乎。曰。有將姚姓者。許字以女。今久不通音矣。姚曰。雄是

也。女自許歸。別有求婚。某並不允。日夜望壻來。豈敢以父之存歿爲間耶。姬感泣。氣咽不語久之。雄載其母子至鎮。遂畢其禮。愚觀今世結婚。時移勢異。仍爲畢其禮者有矣。然而外無過責。內未必其無憎心也。必若姚將軍。乃不負格中之語耳。**附錄**張寅安福人。弱冠出亡之冀。有憐其才者。館穀之。成化甲子。領順天鄉薦。冀人欲與之聯姻。寅曰。幼嘗聘邑人康氏女。今南北不相聞問者已十年。何忍因其年遠地隔而竟負之耶。會試不第。乃南歸。先是康之父母亦議改適。女自經以誓。凜凜不可奪。至是遂諧。伉儷登進士。封康爲安人。此念婚姻之重。不以時勢易心者也。**賈義**袁氏世範曰。人之男女。不可於幼小之時。便議婚姻。大抵女欲得託。男欲得偶。若論目前。悔必在後。蓋富貴盛衰。更迭不常。男女之賢否。須年長乃可見。若

早議婚姻。事無變易。固為甚善。或昔富而今貧。或昔貴而今賤。或所議之壻。流蕩不肖。或所議之女。很戾不檢。從其前約。則難保家。背其前約。則為薄義。而爭訟由之。以興可不戒哉。

三十功 本族俊髦子弟。貧不能成學。特為扶持培育。一

為三十功。出財另記。◎本族絕後。貧窮無嗣立者。歲時為之奉

祀。

五十功 族有孝義節烈。特為倡首表章。不惜財力。為五

十功。出財另記。◎待同宗孝義節烈之人。知其貧乏。加意贍

恤。**增註**亦當照上條旁註**發明**何東山家規曰節義

之人。乃天地正氣所鍾。光祖宗。榮親族。莫大乎是。後世但有男子仗義而窮。婦人守節而苦。不能自存者。豈可不為之慮。而使之失所耶。合族俱當義處。資給以成其美。不得輕慢。靳嗇。

百功居家。凡遇小功總麻之喪。俱不敢服色服。**指終身**

言增註

倘嫌避父母在堂。則屏除一切重色服。如紅綠鑲錦等類。然以先王之禮論之。未聞小功以下之喪。為父母在堂。而可一概抹却也。今人或不及古。若不便屢服素衣。則但屏除重色服。減半記功。所得記功者。非僅嘉其合禮。正嘉其情誼之不失也。**發明**朱文公言呂與叔集中。一婦人墓誌。凡遇功總之喪。皆疏食終

其月。此可爲法。

三百功高門大族。率先講求敬宗合族之道。

增註 謂如修祠塋。明

譜系。立講會。崇敦睦。別賢能。著勸戒。凡此等事。無惜費心。無憚勞心。率族舉行。規模自一人而立。故其功爲甚大。至於錢財之費。輕重多寡。則自有計錢論功之例也。按白文特重率先。然能循守勿怠者。亦應減等記功。**發明** 禮記曰。適子庶子。祇事宗子宗婦。雖貴富。不敢以富貴人宗子之家。雖衆車徒。舍於外。以寡約入。不敢以貴富加於父兄宗族。○程伊川曰。管攝天下人心。收宗族。厚風俗。使人不忘本。須是明譜係。收世族。立宗子法。宗子法壞。則人不知來處。以至流轉四方。往往親未絕。不相識。○黃庭堅與從弟書曰。

每思昆弟間。多有困頓貧乏。稍從容者。便當助其甘
旨。吾儕所以衣冠仕宦者。豈已力哉。皆是祖宗以來
積累。偶然冲和之氣。在此一枝耳。其實相去不遠。宜
深念之。○方正學曰。立祠祀始遷祖。月吉必謁拜。歲
以立春祀。族人各以祖祔食。而各以物來祭。祭畢。相
率以齒而宴。齒之最尊而有德者。向南坐而訓族人
曰。凡爲吾祖之孫者。敬父兄。慈子弟。和鄰里。時祭祀。
力樹藝。無胥欺也。無胥訟也。無犯國法也。無虐細民
也。無博奕也。無鬪爭也。無學歌舞以蕩俗也。無相攘
竊姦侵以賊身也。無鬻子也。無大過不黜妻也。勿爲
奴隸以辱先也。有一於此者。生不齒於族。死不入於
祠。皆應曰諾。然後族人之文者以譜至。登一歲之生
卒。而書舉族人之臧否。其有婚姻相調。患難相恤。善
則勸。惡則戒。臨財能讓。養親事長。能孝而悌。親姻鄉

里能睦而順。此其行之足書。舉書之。累有足書者。死則爲之立傳於譜。其有犯於前所訓者。亦書之。能改則削之。族人見必揖。雖貴賤貧富不敵。皆以其屬稱喜。必慶戚。必弔。死以其屬服。無服者爲之。是日不肉而群哭之。群祭之。群葬之。○王氏家訓曰。祭田所以奉先。亦以睦族。宦達及有力者。宜留意焉。每年除辦祭完糧外。扣算多寡。悉以周給。最急則孤兒寡母。其女之無依者。其餘最貧次貧。酌而給之。而勸戒亦行於其中。孝弟篤學。敦朴力農者。厚卹焉。遊惰則殺矣。治家無法。孝弟有虧者。又殺矣。并明示以殺之之故。其大犯家規者。靳勿與。俟其改過。日給之。○陽羨何公論睦族之要有三。曰尊尊。曰老老。曰賢賢。各分屬尊行者。尊也。則恭順退遜。不敢觸犯。分屬雖卑而齒邁衆老也。則扶持保護。事以高年之禮。有德行族彥。

賢也。賢者乃本宗楨幹。則親炙之。景仰之。每事效法。忘分忘年。以敬之。此之謂三要。又有四務。曰矜幼弱。曰恤孤寡。曰周窘急。曰解忿競。幼者穉年。弱者鮮勢。人所易欺。則矜之。一有矜憫之心。自隨處爲之效力矣。鰥寡孤獨。王政所先。況乎同族。得於耳聞目擊者乎。則恤之。貧者恤以善言。富者恤以財穀。皆陰德也。衣食窘急。生計無聊。命運亦乖。則周之。量已量彼。可爲則爲。不必望其報。不必使人知。吾盡吾心焉。人有忿則爭競。得一人勸之。氣遂平。遇一人助之。氣愈激。然當局而述者多矣。居間解之。族人之責也。亦積善之一事也。此之謂四務。引伸觸類。爲義田。義倉。爲義學。爲義塚。教養同族。使生死無失所。皆豪傑所當爲者。善乎陶淵明之言曰。同源分流。人易世疎。慨焉寤歎。念茲厥初。范文正公之言曰。宗族於我。固有親疎。

自祖宗視之。則均是子孫。固無親疎。此先賢格言也。人能以祖宗之念爲念。自知宗族之當睦矣。○彭澤王氏宗講約云。每會周咨族人。有身家難處之事。內外難處之人。卽對衆請教。衆隨所見。與細心商確。凡可解免其患難。裨益其身心者。無不具告。乃見家人一體之意。又問族中某人有某善行。卽對衆稱揚。兼書之紀善簿。以共相效法。又聞某人有某過。亦委曲開諭。令彼省悟。改圖。不可面斥其非。使無所容。庶幾恩不掩義。若有顯過。爲鄉里共知。衆便救正。無徒避嫌姑息。以長其惡。○以上諸條。皆節錄先儒之言。雜誌於此。而所謂敬宗合族之道。其端大畧可見矣。廣義陽姜何公著宗規。極言族類當辨。邱瓊山先生亦謂譜牒宜明。不得攀援名宗。遺落貧賤。昔狄武襄在樞府日。有狄梁公之後。持梁公畫像及告身十餘道。

詣公獻之。以爲遠祖。公謝曰。一時遭際。安敢自附梁公。厚贈其人。遣之。人服其量。胡端敏在處州時。青田它族胡氏。自稱胡安定後。携譜謁端敏。言安定曾教授蘇湖。凡在二州者。皆其子孫。願通譜。端敏峻拒之。曰。某未嘗受斯言於先人。義不敢許。或勸留其譜。端敏不聽。韓襄毅公貴盛時。有遺以宋蘄王畫像者。欲公認爲遠祖。公謝不受。語家人曰。自我作古可也。何必攀附他人。以取譏笑。潘鱗長曰。近來凡薦賢書者。盡引爲同宗。隔省隔郡。一切不論。夫意苟相孚。友朋可效。緩急情或乖離。骨肉亦起戈矛。豈以假託同宗爲親疎也。此意功過格無明示誠詞。然講求敬宗合族之道。亦不可不識此也。

百過本族絕支利其產不爲立嗣。○嫌貧弱欲改嫁悔

婚。

發明

果改悔者。自有王法。陰律特重誅心。

徵事

江

陰有宦家女。自幼納采。及長。其壻產業漸消。宦欲悔婚。壻家訟於縣。縣令郝公勸之如初。宦固請別適。郝公曰。若從尊意。須斷銀三百兩方可。宦依斷。輸銀入帑。郝公曰。此出吾意。未知令愛意若何。必俟面質成招。女與壻赴堂對簿。郝遂厲聲曰。夫婦大倫。縉紳望族。何得悔盟。傷化前慮。壻貧。今有三百金。不貧矣。卽留至後衙。完娶一月而出。聞者皆爲快悅。○嘉靖間。錢塘陸姓爲郡吏。毛經歷愛重之。陸有女。經歷有子。納聘約爲婚。未幾。經歷提問落魄歸。時欲娶女以行。而陸妻變計。覓他女代之。經歷不知也。旣歸。而其子學日進。取科第。官至操江都院。移檄郡中招陸。陸驚喜且懼。及至。操院偶他出。先入見夫人。夫人曰。我父切莫提前事。陸惶恐曰。何敢言。全賴夫人看顧也。

操院歸。禮意甚渥。贈三百金送回。且曰。後尚有所貽。歸而陸之親女至。陸對所饋金。潛然淚下。曰。悲。汝命薄耳。女亦悲不自勝。鬱鬱而亡。陸亦繼亡。後有復來贈金者。竟以無人而返。夫興衰靡定。安可據眼前論人。方陸易女時。爲避其衰。孰知乃遲其興乎。**附錄**宋曹詠侍郎妻厲碩人。始嫁曹秀才。與夫反目而歸。乃適詠。不數年而詠以秦檜之姍黨。驟擢顯官。元夕張燈。曹秀才携家來觀。見碩人服用精麗。供侍尊嚴。嘆謂其母曰。渠合在此中居享。吾家豈能留。後檜死。詠貶新州而亡。碩人領二子歸喪。二子不肖。家蕩。至不能給朝晡。僦居親舊。過故夫曹秀才家。門庭整潔。花竹蓊茂。顧老婢曰。吾當時能安此。豈有今日。因泣數行下。二十年間。夫妻更相悔羨。世態不可料若此。○蘇秦困不得志。如趙。逢其鄰子易水。上從貸布一疋。

約價千金。鄰子不與。夫一布爲千金之償。利極厚矣。而鄰子不與。鄰子知千金非秦所有。而不知秦能有之於異時也。貧賤之士。空言弗信於時。如秦者可勝道哉。衛青少時爲牧牛奴。有一鉗徒相青。官至封侯。青答曰。人奴得無笞罵卽足矣。安得封侯事乎。方貧賤時。豈惟人不信。已亦不自信矣。然而人固不可以目前限也。昧目人可以一醒。○衛青少服役平陽公主家。後爲大將軍。貴顯震天下。公主仇離作配。左右以爲無如大將軍。公主曰。此我家馬前奴也。不可。已而遍擇群臣貴顯無逾大將軍者。迄以將軍丁晉公起甲第。鉅麗無比。軍率楊杲宗躬負土之役。勞苦萬狀。後杲宗以外戚起身。晉公得罪貶海上。朝庭以其第賜杲宗居之。可見世事翻覆。非人能主也。

五十過 嫁娶間苛責致兩相不睦。

發明 司馬溫公曰。文
中子曰。婚娶而論財。

夷虜之道也。夫婚姻者。合二姓之好。上以事宗廟。下以繼後世也。今世俗之貪鄙者。將娶婦。先問資裝之厚薄。將嫁女。先問聘財之多少。是乃駟僮賣婢鬻奴之法。豈得謂之士夫婚姻哉。按溫公專舉論財。愚意亦有於儀文節目之間。此以貧不能具。彼則必欲苛求。致傷情而不睦。此尤士夫家之所不能免也。

二十過 待有服宗親。忽其貧弱。不爲禮。

增註 前云接待
禮文。以貧富異

情。蓋原有禮文者。而其情不無貧富異視。是乃隱微之過也。此則直云不爲禮。蓋已目無宗親。大足啓人以傷心切怨。豈止不能積德。吾深憂其不善保家。衆忌所歸。奇禍之胚胎也。○前條兼親友。此條特提有

服宗親益見其過惡之大矣。豈二十過足以盡之乎。

五過 因小事抵觸尊長。

一過

乖一尊卑次。

發明

陽羨何公宗規有云。兄弟叔姪名分彼此稱呼。自有定序。晚近世風

俗澆漓。或狎於褻昵。或狙於阿承。皆非禮也。至於拜揖必恭。言語必遜。坐次必依先後。不論近族遠族。俱照序列。情實親洽。心更相安。名門故家之禮。原如此也。

◎自恃尊長待卑幼簡

傲忽略無情文。

以下專主朋友

一功 相對惟作正經語。任羣輩謔浪笑傲。不和從。

發明 黃勉

齋曰。義理以講習而明。德性以相觀而善。孑然獨立而無與爲侶。則學問廢而識見淺。繩約弛而怠慢生。古人所以重朋來之樂者。豈不以此歟。然則相對惟作正經語。固待朋友之道也。謔浪笑傲。奚所取諸。

◎ 知其匪人。不明言。不妄與交好。

發明 薛文清曰。不可因人曲爲承順。

而遂與之合。惟以義相接。則可與之合。○章楓山曰。友也者。友其德以資乎我者也。貴自審而已矣。審其正。則從乎其正。審其邪。則絕而勿從。凡與言終日。納我以道者。皆正也。凡與好終日。不納我以道者。皆邪也。楓山此言。太覺嚴峻。所謂匪人。大約指奸險無行之人。非必不納我以道者。卽謂之匪人也。然亦可見。

先賢論交之謹嚴矣。○朱子曰：游從稍雜，與此曹交處最易親狎，而驕慢之心日滋。既非所以養成德器，其於觀聽亦自不美。所損多矣。有國家者，猶以近習傷德害政，況吾徒乎？然亦非必絕之，但吾清心省事，接之以時，遇之以禮，彼將自疎耳。**廣義**：或問朱子與朋友交後，知其不善，欲絕則傷恩，不與之絕則又似匿怨而友其人，曰：此非匿怨之謂也。心有怨於人，而外與之交，則爲匿怨。若朋友之不善，情意自是當疏，但疏之以漸，若無大故，則不必峻絕之。所謂親者無失其爲親，故者無失其爲故也。

◎損友招

引遊戲不從。

徵事

管甯少與華歆同席讀書，有乘軒冕過門者，歆廢書出門觀之，還至讀書所，甯與割席分坐，曰：子非吾友也。觀此，則不惟已身自持，而且當有以正之矣。然亦有習與性成，難與正

者。故功過格於其能自持已。卽以功許之歟。

◎規範方嚴及學術博通之

友樂與親近虛懷領益

附錄

華陽范氏曰。與賢於已者處。則自以爲不足。與不如

已者處。則自以爲有餘。自以爲不足。則日益。自以爲有餘。則日損。○何子元曰。周濂溪先生令郴時。郡守李初平聞先生論學。欲讀書。先生曰。公老無及矣。請爲公言之。初平聽先生語二年。卒有得。唐彥思記伊川先生謂古人有言曰。共君一夜話。勝讀十年書。若一口有所得。何止勝讀十年書。耶賢師益友。化人之速。有如此者。

十功朋友有過。忠告善道。

發明語意重在善道。蓋告之者。意欲其改。非第舉其過而

已也。故非善道不可云忠告。程子遺書問與人居視其有過而不告則於心不安。告之而不受則奈何。曰與之處而不告其過非忠也。然要使誠意交通於未言之前則言出而人信之矣。又曰責善之道要使誠有餘而言不足則於人有益而在我無自辱矣。

三十功

良朋契合相規相勉鼓舞玉成

發明 尹和靖曰學問雖是要從

師然賴朋友相成處甚多。師只是開其大端。又體貌嚴重。若於從容閑暇之際委曲論難須是朋友更發明得仔細。**徵事** 鄒浩初與田畫友善。元祐中浩為右正言畫往見曰平生與君相許者何如今君為何官。浩曰上遇羣臣未嘗假辭色獨於浩差若相向者。今天下事不可勝言欲待信而後發庶有益耳。畫然之

及劉后立。畫謂人曰。志完不言。可絕交矣。浩入諫。得罪。編管新州。畫迎諸途。浩見之。流涕。畫正色曰。使志完隱默。官京師。遇寒疾。不汗。五日死矣。豈獨嶺表之外。能殺人哉。願母以此舉自滿。士所當爲者。不止此也。浩悚然謝之。○蘇昞季明者。武功人。事橫渠先生最久。後卒業程氏。時尹焞彥明方業舉。造之。昞謂曰。子應舉得狀元及第足乎。曰。何敢望此。昞曰。子謂能狀元及第。學盡是乎。爲此外復有學也。焞不省。明復造問之。昞茶次。舉盃曰。卽此是學。焞有省。昞令詣程先生受學。昞後坐上。章論國事。竄饒州。行過洛。館彥明所。頗以遷貶爲意。彥明曰。當季明上書時。爲國家計。取計則饒州之貶。猶爲輕典。季明於是渙然。彥明始學本。季明所指。燹已危幾。賴彥明而安。故夫學須友。

以成也。○顧氏庭聞遺述云。東萊嘗勸晦菴於矯揉氣質上做工夫。因有當以顏子自厲之說。而晦菴他日與東萊書云。伯恭天資溫厚。其論平恕委曲之意多。而某之質失之暴悍。凡所論皆有奮發直前之氣。二者皆非中道。但某之發足以自撓而傷物。尤爲可惡。而伯恭似亦不可專以所偏爲至當也。又書云。大抵前日之病。皆是氣質躁妄之偏。不曾涵養克治。任意直前之弊耳。又書云。近日覺得凡百應接。每事皆有些過當處。不知如何整頓得此身心。四亭八當。無許多凹凸也。又云。平生性直。不解微詞廣譬。導人於善。故見人有小失。每忍而不欲言。至於不得已而有言。則衝口而出。必至於傷事而後已。此亦太陽之餘證也。晦菴晚歲之言如此。卽是而觀朱呂之所以切劘而箴誨者爲何如耶。

附錄

陳仲醇與諸友登塔絕

頂謂友曰。大抵做向上人。決要士君子鼓舞。只如此。塔甚高。非與諸君子乘興覽眺。必無獨登之理。既上四五級。若有倦意。又賴諸君子慫恿。此去絕頂不遠。既到絕頂。眼界大。地位高。又須賴諸君子提撕警惺。跬步一差。易至傾跌。只此是做向上一等人榜樣也。

五十功

不負一素交

徵事

白敏中應試時。典文衡者欲舉為第一。嫌其與賀拔甚為友。密

令所知喻意。既而拔甚造門。左右給以他往。敏中躍出。見之曰。吾可以第一。負素交耶。

◎視至

交遺孤如子姪。憂樂關心。

增註

此指內念言。不論貧富也。如出力出財。另論事。

論錢記功

徵事

尹師魯洙以貶死。其子朴方襁褓。既

長。韓魏公聞於朝。命官教之。如子。朴少年有才。所為

或過舉。魏公掛師。魯之像哭之。

百功。不以勢交。不以利交。專以道德肝膽交。

就終身言。發明。聞鐘。

集曰。戴宏正每得密友一人。則書簡編焚香告祖考。號金蘭。薄其鄭重如此。今之泛交者何爲也。○方正學朋友箴曰。朋友敬而遠。益友宜相親。所交在賢德。豈論富與貧。君子淡如水。歲久情愈真。小人口如蜜。轉眼若讐人。○葛洪曰。君子之交也。以道義合。以志氣親。故淡而成焉。小人之接也。以勢利結。以狎慢密。故甘而敗焉。徵事。廬陵張千載號一鶚。文文山友也。文山貴時。屢辟不出。及文山敗。還吉州。一鶚潛出相見。曰。丞相往燕某亦往往。卽寓文山因所近側。三年供送飲食無缺。又密造一櫝。文山授命日。卽藏其首。

訪知夫人歐陽氏在俘虜中。便火屍拾骨置囊中。并
櫝南行付其家。先一日文山之子夢父曰。吾從毅甫
還矣。已而果至。若此之交。千載下聞風。猶爲唏噓感泣。

三百功 始終周旋一至交。

事以情誼言。出錢則另記功。徵

言不可一日無侯。無可。或問之曰。無可能攻人之過。
一日不見。則吾過不自知矣。與顏易衣而出。營衣食。
均所入以給二家。顏病徒步千里爲求醫。歸死矣。目
不瞑。人曰。其待侯君乎。無可撫之而瞑。顏無子。不克
葬。鬻衣裘葬之。顏嘗有先世數喪未葬。比死以爲憾。
無可力營辦。竟葬焉。又撫嫁其孤妹。**增註**此條不兼
宗親者。蓋惟朋友中有性命之交。真猶
同胞兄弟。如此用情。固非概施者也。

三百過

不慎擇交偏私成黨

發明王伯谷論古今黨人之禍大意曰朋黨之名雖

屬小人借題以空善類。其實君子自致之。不講於聖人中正之道。阿其所好。互相推重。又喜於人之和從。遂有借名趨勢之徒。奔走附會之。招結日盛。門戶遂成。而小人因得以逞其說。若漢唐宋明諸君子。誠不能免於春秋之責備也。

五十過

富貴家居忘一貧賤時至交

增註謂如別久不念及晤對落落與

曩時大異也。若見其貧乏不顧為百過。乃又加之者。條例各有分別。**發明**先賢有云。與其結新交。不如敦故誼。譬如人未遇時。婦則親操井臼。友則共守寒窗。僕則忍饑寒。冒風雨。以畢犬馬之分。日夜盼望運轉。

時亨。可共安樂。而不虞一旦新寵進。則色衰者退。貴遊密。則窮交者疎。俊僕多。則朴守者棄。疇昔恩義。盡置若忘。刻薄寡恩。造怨賈禍。無有甚於此者矣。平旦清明之際。盍三復於斯言。

三十過

謀身念重負一素交

增註

負之者。謂交誼素厚。忽變為不相契也。非如昌

黎所云落陷阱。反擠之。又下石焉。如是豈復有人心者。尚以功過較耶。

徵事

楊憑為京兆尹。御史李實簡

劾之。貶臨賀尉。及行。獨所善友徐晦送至藍田。故相權德輿言。君送楊臨賀。誠厚。無乃為累乎。晦曰。晦自布衣時。楊臨賀知我厚。方茲流播。甯忍無言而別。有如公為奸佞譖斥。晦敢自同路人乎。德輿嘆其長厚。未幾。李實簡請為監察。謂曰。君不負楊臨賀。肯負國乎。由是知名。

附錄

古詩云。結交若失人。中道生謗言。

君子芳桂性。春濃寒更繁。小人槿花心。
朝在夕不存。惟當金石交。可與賢達論。
◎因責善不

堪遂成疎棄

徵事

三國徐原慷慨有才志。呂岱知其

有得失。原輒諫諍。又公論之人前。或以告岱。岱嘆曰。是我所以貴德淵也。及原死。岱哭之甚哀。曰。德淵。呂岱之益友。今不幸。岱復何由聞過。○胡五峰曰。能攻人實病者。至難也。能受人實攻者。尤難。人能攻我實病。我能受人實攻。朋友之義。其庶幾乎。不然。其不相陷而為小人者。幾希矣。○何垣曰。與剛直人居。心所畏憚。故言必擇。行必謹。初若不相安。久而有益多矣。與柔善人居。意覺和易。然而言必予贊也。過莫予警也。日相親好。積尤悔于身而不自知。損孰大焉。故美味多生疾。疾藥石可保長年。

二十過。或德行。或才學。可爲已師。不知屈服。視同平等。

反生嫉妬者。一念一過外。再加五十過。**附錄**張橫渠在京坐虎皮說周易。聽從甚衆。一夕二程至。論易先生淡厭服之。次日撤去虎皮。曰。吾平日與諸公說者。皆亂道。有二程近到。淡明易道。吾所弗及。汝輩可師之。乃歸陝西。先生與大中公爲表兄弟。二程其卑行也。而服善如斯。虛公洵不可及也。○潘叔度與呂伯恭爲同年進士。年又長。自視其學非伯恭比。卽俯首執弟子禮。而師事之。畧無難色。朱子稱之。○趙郡李謚。少年師事博士孔璠。數年後。學大進。璠還就謚請業。時人爲之語曰。青成藍。藍謝青。師何常在。明經可知。師友之間。惟視其學以爲禮也。

十過 嚴正友與親近

增註

謂如來晤。則託故以辭。相對。則惟恐久留。一似畏避奸險。

匪類之人。無志氣者。往往然也。犯此條。則其生平必多不可問。吾甚為危之矣。**附錄**昔徐文貞當國。松坡畢公在言路。舉朝嚴畢公。甚於文貞。議且出畢公於外。文貞曰。諸公畏之耶。皆蹶蹶曰。豈謂畏之。黃門切直。慮其府禍耳。文貞曰。不然。吾亦畏之。顧念人孰無私。私必害公。有若人在。不敢自縱。可寡過也。聞者嘆服。

◎進言慙直致交道乖違

發明

陽明先生曰。朋友之交。以相下為主。故相

會之時。須虚心遜志。相親相敬。或議論未合。要在從容涵育。相感以誠。不得動氣求勝。長傲遂非。又曰。大凡朋友。須箴規指摘處少。誘掖獎勸意多。後又戒九川云。與朋友論學。須委曲謙下。寬以居之。諸語皆交

友之良
箴也。

三過

隨一淫朋遊戲。

徵事

徐性善與楊宏憲友也。赴試同寓。有僧精相。謂楊當大貴。徐當

貧。躋是夕。楊偶為邪色所動。欲偕徐往。徐嚴詞止之。次日僧見之。大駭曰。一夕之間。如何便有陰陽。文俱大顯矣。果同登進士。雖所云遊戲。僅指細事言。然觀此一節。則知吾人立品。方正第一。斷不可隨人步趨也。○觀者尤當着眼。在止之二字。

◎**負才傲睨一平交。**

增註

不必果形諸外。止就

其心言。**徵事**唐張昌齡王公治皆善屬文。名振京師。考工員外郎王師旦知貢舉。黜之。舉朝莫曉其故。及奏策。帝怪無二人名。師旦對曰。二人雖有辭華。然其體輕薄。終不成令器。若置之高第。恐後進效之。傷陛

下雅道。帝善其言。聖賢成人。朝廷用人。皆重學。不重才。遽以自負。且不可。况傲睨平交乎。雖僅在三過之條。實則短壽折福。莫甚於此。

一過 待至交子姪多作虛恭。

徵事

韓持國與程伊川善。暇日同遊西湖。命諸子侍

行。次有言貌不莊敬者。伊川回視厲聲曰。君輩與長者行。敢笑語如此。韓氏孝謹之風衰矣。持國責令跪

謝。

◎相對效時俗惡習戲侮失體。

發明

程子曰。近世

淺薄。以相歡狎爲

相與。以無圭角爲相歡愛。如此者。安能久。若要久。須是恭敬。君臣朋友。皆當以敬爲主也。張子曰。今之朋友。擇其善柔以相與。拍肩執袂。以爲契合。一言不合。怒氣相加。朋友之際。欲其相下不倦。故於朋友之間。

至於敬者。日相親與。得效最速。先賢之言如此。吾不解讀書士子。競好爲隸卒之態。而交道日以浮薄。豈未聞教於兩夫子也。○樂與一損友交接。

增註

謂其無畏避之

心也。若從其誘惑者。

另有過。

發明

余忠宣公曰。人若近賢良。譬如紙一張。

以紙包蘭麝。因香而得香。人若近邪友。譬如一枝柳。

以柳穿魚鱉。因臭而得臭。

徵事

安童母宏吉刺氏。昭

睿皇后之姊。通籍禁中。世祖一日見之。問及安童。對

曰。安童雖幼。公輔器也。世祖曰。何以知之。對曰。每

退朝。必與老成人語。未嘗狎。一年少。是以知之。

○

至交晤對。但商才學用功。不及德業。

徵事

謝上蔡資

性明敏。自負該

博。對明道舉史書成篇。不遺一字。明道曰。賢却記得許多。可謂玩物喪志矣。謝聞此語。汗流浹背。後見伊

川伊川問其所造曰纔去得一矜字伊川喜悅可見
古人愛人以德不才也。**附錄**黃陶菴社集日記錄
叙文云交道之喪久矣高者不過鬪炫詩文下者乃
至徵逐酒食其聚會也或甘言巧笑以取悅或淡情
厚貌以相遁求其責善輔仁者蓋千百不得一焉予
爲之慨然而憂惕然而恐壬午春有同志斯道者十
餘人爲直言社平居自考咸有日記赴會之日各出
所記相質顯而威儀之際微而心術之間大而君父
之倫小而日用之節講論切偲必求至當之歸而後
已諸子奮志進修日新月異苟一言不合乎道一行
未得乎中。小經指摘。立自刻責。飲食俱忘。

婢僕

盡倫之八**總論**佛告尸迦羅越言一切世人
視其奴僕當有五事一者先用知其饑渴寒

暑。然後驅使。二者有病。當爲醫治。三者不得妄用。鞭撻。當問虛實。然後責治。可恕者恕。不可者訓治。之。四者若有纖小私財。不得奪之。五者給與物件。當同平等。勿得偏曲。○胡振安曰。女子小人。最爲難養。莊以蒞之。慈以畜之而已。恤其饑寒。時其勞逸。憂其疾病。不數詈罵。皆功也。而家法謹嚴。毋使爲非。尤功之大者。

一功

一事體恤艱苦

徵事

曾文恪公鐸。爲舉人時。遠行遇雨雪。止旅舍。憐馬卒寒苦。令臥

衾下。因賦詩曰。破布青衫弱稚兒。馬前怎耐浪驅馳。凡由父母皆言子。小異鄉廬我却誰。事在世情皆可破。恩從吾幼不難推。泥塗還○白還一人。原值百錢一功。○

遣婢出嫁給與資財百錢一功

三功

可怒不怒又善教之

徵事

馬封翁年四十止生一

子甫五歲一日婢偶抱出門失手跌傷左額而死封翁見之呼婢奔避自抱死兒入婦驚慟幾絕撞倒封翁數次索婢撻之無有婢歸母家日夜祝天願公早生貴子次年遂生森左額宛然赤痕後爲戶部尚書夫婢僕犯罪之大者孰如死其子此事尚可恕又何事不可恕乎○袁氏世範曰奴僕小人就役于人者天資多愚作事乖違難得妥當省力又性多遺忘或有付囑遵行錯悞又應對粗率不識守分不自認過致主人於使令之際常多叱咤其爲不改其言愈辨其主愈不能平於是箠楚加之或失手而至於重傷幾死者有矣凡爲家長者子

使令之際。有不如意。當云小人天資愚暗。宜寬以處之。多方教誨。不發嗔怒。如此。則婢僕可以免罪。爲主者。冒中亦大安樂。省事多矣。至于婢妾。其愚尤甚。婦人既多褊急。狠愎。又不知古今道理。其所以責備婢妾者。又非丈夫之比。爲家長者。宜于平日常教以待婢僕之道。其間必自有曉然者。若婢僕有小過。不可親自鞭打。蓋一時忿氣所激。數必不計。在婢僕亦未必心服。惟徐徐責問。令人代扑。視過輕重而定其數。雖不過怒。而自有威。婢僕亦必畏憚。既撲之後。呼喚戒諭。辭色如常。則無他事。倘怒之不釋。小人懷怨。萬一輕生而自殘。可不戒哉。王伯谷曰。○富貴收一婢。讀此。令人心寬意豁。備錄以公諸世。

僕必熟問先世何若。何因賣身。曾有家主與否。不敢

濫收。

每一次爲三功。

增註

或遇背主投勢者卽宜叱

去不納。或係強暴不仁之人亦宜遣發不可濫

收。若舊家子弟不得已而作人婢僕此爲可憐憫事不可不卽還其券。若厚德者能更出財周恤另論錢

記功。

徵事

馮京父四十無子妻授以金曰可至京買

一婢作妾後得一女有愁容問之曰父因綱運欠官糧賣妾以償遂惻然不忍犯卽遣還不索其錢及歸後妻遂有身將產之夕遠近鄰家皆夢鼓吹喧闐送狀元至馮家生子因名曰京連中三元爲名執政○鍾離瑾宰德化將以女適鄰縣許令之子命吏買一婢伴嫁一日瑾視事退遇婢掃地停箒掩泣詰曰被詬杖乎女曰無之妾父亦曾令是邑不幸與母俱喪時妾方五歲育于吏家數年今主欲買婢吏以妾應命戒勿吐實甫見公治事念先人不覺悲耳公急呼

吏質之。大爲垂憫。誠家人爲易服書抵許。公告緩期。將掇已女。妝先嫁焉。許亦惻然。復書曰。昔蘧伯玉耻獨爲君子。公能抑已女。拔人之孤。予有季子。願以爲配。遂分奩以歸一女。瑾夢一人前拜曰。不圖賤女過蒙君賜。冥簿已益公壽。并顯公子孫。後瑾歷任江淮轉運使。壽九十六。子多顯仕。蓋不得已而淪爲賤者。恒有此等事。故不可不熟察。非謂必問之者。僅慮其累已也。夫慮其累已。孰無是心。何遂許其功乎。

十功待父時用事老僕不失禮貌。◎知婢僕間兩有屬

意卽爲配合。

發明其始必隱爲誠諭得其真情。兩不忍舍。因各遂其願。或日後有所睽違。在

家主則已盡道矣。恐漫置不理。及苛加責罰。有傷家門雍肅之化。然旣爲富室大家。必須嚴別內外。則何

自有此等事乎。○竈養僕生女。有願許適平人者。順其情不強。

二十功 遇一病。用心醫治。獲痊。○配一男女及時。**發明**

詩序

衍義曰。男女及時之說。聖人之慮天下也。血氣既壯。難盡自檢。情竇既開。奚顧禮義。故昏欲及時者。所以全節行于未破之日。學欲及時者。所以全智慮于未分之時。○薛文清曰。男女之欲。天下之至情。聖人能通其情。故家道正而人倫明。

三十功 飲食與其勞苦必恤。遇事善導。不加苛責。一年

無間。

增註

此於逐事計功外又加計者徵事趙郡王

獻刺定州詔領兵監築長城時正溽暑獻途中

屏蓋扇親與軍人同勞苦長吏餽以冰獻嘆曰三軍
皆飲溫水吾何忍獨進寒冰遂至消液竟不一嘗兵
皆感悅此所謂飲食與其勞苦必恤者也○李日知
居官不行捶楚而事集有令史受勅三日不行日知
怒欲捶之旣而曰我欲捶汝天下人必謂汝能掠李
日知嗔受李日知杖不得比于人妻子亦棄汝矣遂
釋之吏感悅以後無敢犯者此所謂遇事善導不加
苛責者也○滎陽太君鄭氏比部郎元寬妻也比部
早世子稹積方齟齬家貧無從受業母手詩書親授
之皆以通經舉高第旣諸子俱入仕祿秩甚薄每給
衣食皆始自孤弱者次踈賤者親者悅踈者來傭保
乳母有垂白不忍去元氏之門者持家二十五年專

用訓誡去鞭扑正顏色以訓諸女婦。諸女婦戰兢如履冰。正辭氣以訓諸子孫。諸子孫心愧耻若撻于市也。婢僕終歲不聞忿爭聲。童孺成人。曾不識夏楚。閨門之內。熙如太古時。蓋漸于化云。豈謂丈夫治家不能若女子哉。

○奴僕美質子弟愛其材爲之教誨成學

出財

延師則另記功

○遣一婢慮其終身必爲擇配

發明李文靖公沆有一僕

逋宅金十千。一夕遁去。留一女將十歲。美姿格。自書一券繫其帶。願進此女以償焉。公大惻之。屬夫人曰。當如已。子育於室。訓教之。及長。爲擇偶。具奩嫁之。請夫人親爲結褵。以主婚。務在明潔。夫人如所教。其父母後歸舊京。感公淪刻心骨。公疾病。夫婦割股爲羹饋之。及薨。衰經三年以報。

○發達後不

白收投勢之僕。

發明

沈文端文雅社約曰。吾輩鄉宦

皆好省事。而僕從則務喜多事。惟多
事。故僕從亦鄉宦也。假令一鄉宦使十人。十鄉宦使
百人。則一邑有百鄉宦矣。嗚呼。一邑中百鄉宦。其氣
燄豈不薰塞邑里。吾兩手兩目。既不能遍戢之。乃猶
復招延之未已。豈不益自苦哉。予既已驗之久。知之
真。何敢不盡言。與諸公相告。大凡僕從。只將就足用。
不必太多。太多則衣食於我者。侈矣。若謂有不衣不
食。而爲我服役者。則益不可。何也。彼不衣不食。而爲
我服役者。非徒也。必藉我以行其私也。彼藉我以營
私。吾因彼以歛怨。則我之役彼者。一時奔走
之微勞。而彼之役我者。終身名節之大窳也。

五十功得婢僕姪盜等情。絕不聲說。隱然誠諭之。如其不改。

卽善遣之

附錄

張齊賢爲運使時家宴一奴竊銀器

數事于懷中公在簾下熟視不問後公三爲宰相廝役皆得班行而此奴竟不沾祿乘間泣請公憫然語之曰我不欲言爾乃怨我爾憶江南日盜我銀器數事乎吾懷之三十年不以告人今備位宰相進退百官志在激濁揚清安敢以盜賊薦也念汝事我久今我與汝錢三百千汝去自擇所安蓋我旣發汝私汝宜愧而不可復留也奴震駭泣拜去

○勤苦

起家僕老病無依養老送終

增註

如老邁不堪仍責令服役且多欺侮菲薄

之情恒令人憤懣含羞便不得謂之養矣豈得濫冒記功

○約束僕輩有家範無

令肆越

發明

周琬公曰馭下之道戒其刻也貴乎有恩又戒其玩也貴乎有法令之懽然悅服而

復肅然敬謹。庶幾恩威有紀。而上下無相失矣。若徒知養之以恩。而一味寬柔用事。諺譏之曰。猶鼠同眠。言其過於煦煦。而全無威嚴以畏忌也。其爲弊有較甚於苛急無恩者。或肆橫於外。而彈壓不得行。或斂亂於內。而麾遣不能去。顧盼自雄。蔑焉無主。豈非難堪者乎。昔北魏陸侯受命爲懷荒鎮將。高車諸莫勿訟侯嚴急無恩。復請前鎮將郎孤。魏主徵侯還。以孤代之。侯還言於魏主曰。不過期年。郎孤必敗。明年諸莫勿果殺郎孤而叛。魏主驚立召侯問之。對曰。高車不知上下之禮。故臣臨之以威。制之以法。欲以漸訓導。使知分限。而諸莫勿惡臣所爲。訟臣無恩。稱孤之美。孤還鎮。悅其稱譽。益收名聲。專用寬恕待之。無禮之人。易生驕慢。不過期年。無復上下。孤所不堪。必將復以法裁之。如此。則衆心怨懟。必禍亂矣。夫寬恕何

非美德。然過寬必生驕慢。適為禍階。古人所以稱寬難也。余見治家犯此病者。往往而有。易曰。嘻嘻終吝。可無戒乎。**附錄**格言彙編云。待婢僕如行軍。法律要嚴。情意要治。○薛文清曰。待左右當嚴而惠。又曰。待下固當謙和。謙和而無節。反納其侮。所謂重巽吝也。惟和而莊。則人自畏而愛。

百功貴族大家立家法。不用一俊僕。不用一強僕。惟用

樸誠忠厚勤慎準繩之人。使子孫世守。

發明

澹園醒

語曰。僮僕便

捷有才幹。能營聚財貨者。雖得其資助。日後恃寵生事。賈禍卒致敗家業。玷名節。諺云。養癡奴。乘羸馬。此言雖小。可以喻大。**徵事**司馬溫公有一僕。二十年只稱君實秀才。蘇學士來謁。因聞而教之。明日改稱大

參相公。公驚問。以實告。公曰。好。一僕被東坡壞了。○
溫公獨樂園。一園子姓呂。公以其樸直。遂以直名之。
春時遊人至園。競投茶湯錢。積至十千。一日來納公。
公曰。此自汝錢。可持去。再三欲留。公怒。遂持之。顧曰。
只端明不受錢者。後十許日。公見園中新創一井亭。
問之。乃前不受十千所創也。連誌此事。以見司馬相
公之家風。類多樸誠。準繩之人。易曰。同聲相應。同氣相求。理固然歟。

○敬畏老成正直

有諫必從。有規必納。無少厭怠。

徵事明孝宗爲東宮時。嘗念高皇經。內侍

覃吉適至。東宮驚曰。老伴來矣。卽以孝經自持。吉跪
曰。得毋念經乎。曰。否。吾纔讀孝經耳。其敬畏小心如
此。○富僕無嗣立者。不取其家財。爲之廣施。以資其

福計錢論功外。另加百功。**附錄**松陵計舉人。有僕家

福累三千金。將死。子方十歲。請獻其半於主。以保孤

主人曰。我受之。無名。但汝下人而致富。若此。豈無刻

事。且享福過甚。致損汝壽。安能善後。當以半為汝子

種德耳。僕感泣長逝。主人盡散其半。行種種方

便事。延明師與已子同學。後僕子與已子同科。東宮

三百過賣婢得重價致陷醜類除賣婢常規外。所多得

奇貧急難時。家有美婢。旁人煽惑。守正不從。慎為擇

配。准記三百功。**廣義**即賣人作妾。亦宜叩問其情。願

則從之。不願則否。此正所謂待婢

僕如子女。未有不獲忠愛之報者。○**遇德行才學兼**

至者意中猶以僕輩視之。**徵事**陳文襄公有家僕。為

諸生。文才卓絕一時。公待

之如賓。延以教子姪。其人謙讓不敢。公笑曰。舜德既至。丹朱能不執臣子禮乎。令子姪皆拜而受教如此。盛德求之古人。亦不多觀。

百過殘一人肢體。◎誤收舊家子弟作婢僕。知而不還。

其契。◎任用僕輩。不求佐家輔德。老成忠直。則疎棄。

之姦佞諂悅。則樂親之。

徵事益王宮翊善姚坦。好直諫。王每有過失。必規正。宮中

皆不喜。左右乃教王稱疾不朝。太宗日使視之。逾月不瘳。上甚憂。召王乳母問王疾增損。乳母曰。王無他疾。徒以翊善姚坦。檢束王不得自便。王不樂。故成疾耳。上怒曰。吾選端士輔佐王。爲善事。今王不能用。規

諫而詐疾欲使朕逐去正人以自便何可得也王年少未知出此此必爾輩為之謀耳因命粹至後園杖之數十召坦慰諭之附錄薛文清曰便辟側媚小童最能順人志意使人不覺傾向幾至心不能持自非明理剛特有守之君子鮮不為所移者以是知古之比頑童之訓其慮深矣又曰以顏子之亞聖聖人猶告以遠佞人佞人之害豈惟為邦即處家亦然凡妻子婢僕其言足動聽者皆當察之

五十過 不許人贖子女

三十過 濫收一强悍人

附錄顧端木先生曰恒言陰德蓋昉西伯陰行善之意說者謂

陰德如耳鳴人不及知已獨知耳夫西伯發政施仁曉然與天下共見之甯有所藏匿掩護如夜行者哉

吾以爲陰之云者。人受其德而已。不知之謂也。虞芮
質成入境。輒讓田不取。西伯豈知之也哉。夫德莫大
於已。不知。不德亦莫大于已。不知。何以故。今夫人親
行一不德之事。其爲事也有限。且以讀書明理之身。
卽稍稍冒昧。亦將有晨鐘淡省之時。若夫已所不知
之地。誤爲宵人所依馮。其勢必將淡根延蔓而無所
不至。郭解客殺人。解實不知。武帝曰。解雖不知。其罪
甚于解。殺之。夫殺人。天下之大戮也。今以茫然不知
之人。而定其罪。至甚于殺人。豈非以依馮所在也哉。
若是乎。武帝之淡于律令也。近日某病革。忽發謔。若
對簿狀。曰。某事係某親戚所爲。實不與聞。則自拆曰。
汝親戚緣汝生事。罪皆坐汝。又曰。某事係家人所爲。
實不與聞。又自拆曰。汝家人緣汝生事。罪皆坐。
汝言訖。乃卒。嗚呼。已所不知之地。亦可畏也哉。◎收

一背主來投者。知而不卽遣還。◎怒打重傷。附錄洪州司馬

王簡易得腹疾。中有塊。隨氣上下。旣絕復甦。謂其妻曰。吾舊使小奴。偶因約束太嚴。遂至斃。適至陰司。被小奴持訴。不可解。今腹中物。正彼作祟。吾不久矣。妻曰。小奴安敢如此。曰。陽間有貴賤。陰司則一般也。未幾果卒。◎富僕無嗣立者。取其家財。不賜一享祀。◎多

養婢僕。不使服正經業。教以無益歌謠。計一人。歷半年。爲三十過。

發明許台仲曰。蠹家莫甚。冗食家衆。勿容遊手僕婢。雖供給使令者。亦有課。但視專執者。量加分數耳。觀此。可知婢僕服業。是閑家要緊事。莊渠先生社學禁約云。凡宴會。不許用琵琶三弦。喉管。番笛等音。謂之

淫樂。恐以導子弟。未萌之欲。致乖正教。觀此。則知無益歌謠。尤家庭所切戒者也。

◎不飭規

矩。致令嘈雜無度。

經一年為三十過。

發明

張橫渠先

若到所提掇更謹。則加謹。慢則棄其本心。便習以性成。故仕者入治朝。則德日進。入亂朝。則德日退。

二十過

白收一人。

◎家婢至二十歲外。

不為擇配。

一年為二

十過

◎縱失禮於尊長。怙奴僕。怨尊長。

一事為二十過。
附錄 沈文端文

雅社約曰。每見宦家僕從。遇其主翁親識。屬在寒賤者。即肆與抗禮。且屑越之。其主翁亦怙然。不以為怪。此詎非名分倒置。風俗薄惡。◎在外有生事情狀。知一大事耶。吾輩宜淡以相戒。

而不行誠諭。實生事者。宜加責罰。責罰不已。宜即遣

去。違者。其所犯惡。同自為論。徵事。鼎甲

朱公國祚號養淳為人平易慷慨一日兩公子行街

坊暑月張蓋家人不自歛束蓋觸小戶店蓬破損家

人正與小戶喧競朱公適過小戶泣訴朱公為駐車

借坐民家命僕呼張蓋二人儔人中責各二十慰小

戶人

而去

十過遣婢妾只顧自己得財不擇良配。增註即所配果

良。然當遣之之

時未嘗慎為選擇。此

心不可欺天。仍准過。

◎老病無依者力能周恤。漠不

附錄順治壬辰賊圍漳州數月守將盡括民間

為念

米粟金寶斗粟至六十金民相食各出城謀食

守兵每放一名。要銀六兩。不則出城無驗。目爲私逃。卽被殺。以人肉賣。孝廉謝鴻奇携男婦姊妹十四口出城。其女方週歲。置懷中。不登人數。兵詰曰。此懷中者。非人乎。置之。不然。畱長大者。謝夫婦相商曰。皆骨肉也。孰可棄。惟婢子一口。年十四。與此女孩。可商去存耳。旋曰。婢無父母。八歲依我。至今。我不忍棄。甯棄女。遂置女於地。聲呱呱不絕。含痛出城。其姊踰時方至。則女孩在懷也。曰。城門擁擠。驗票放行。兵指幼女曰。地中呱呱爲肉。幾何。命我持去。幸得一家完聚。各歡然。謝後登戊戌進士。誌此事。見無依之人。當力難兼顧之時。而倍加矜念。斯爲仁人君子之用心乎。

◎勤儉起家僕以平等視

之。◎容任少婢出外。褻狎無體。

增註

按白文是就幼

小時言。愚意十四歲

以外不加閑束任其無體者應准妻妾條閨範不謹例減半論過也。

◎忽略奴僕美質

子弟不爲扶持成學。◎富貴家任事之僕至三十歲。

不爲娶妻。

經一年爲十過。**廣義**古人三十娶妻獨至近世應以廿五六歲爲率。貧者情可諒也。

富貴家每事多過費。何獨不於一家中少盡其情乎。忠厚存心者當亦首肯余言否。

五過虐使一事。

徵事程大中公平居與幼賤處惟恐有傷其意左右使令之人無日不察其饑。

飽寒燠侯夫人治家有法不嚴而整不喜笞扑奴婢視小臧獲如兒女諸子或加呵責必戒之曰貴賤雖殊人則一也汝如是大時能爲此事否傳曰爲人君止於仁臨婢僕亦一家之君也如程門之家主家母。

斯無愧焉。○宋仁宗嘗春日步苑中。屢回顧。皆莫測
聖意。及還宮。顧嬪御曰。渴甚。可速進熟水。嬪曰。官家
何不外面取水。致久渴耶。帝曰。吾屢顧不見。苟問之。
卽有抵罪者。故忍渴而歸。左右皆稽顙動容。呼萬歲。
柴文伯曰。聖性仁慈如是。輒近士庶之家。乃有因口
腹笞責人者。噫。彼亦思何德以堪此。**附錄**顏壯其曰。
上下之分。固自有異。念彼父母。深憐痛恤。情則相同。
我從而輕忽之。困以飢寒。加以鞭責。使其窮愁痛泣。
無所控訴。此豈有人心者所爲。○昔有賣兒詩曰。養
汝如雛鳳。年荒值幾錢。辛勤當自愛。不比在娘邊。語
甚淒惻。發人
愷悌之心。○**聞傳述家庭間短失。不厲色禁止。****明發**

呂文穆公入朝。有朝士譏笑之。同列欲詰其姓名。公
急止之曰。若一知姓名。便恐不能忘。不如不知也。夫

他人過失。猶願不知。何況家庭。且傳述之言。未免過實。氣性未純者。又未免發之過情。彼此情傷。從是而欲求其睦。不可得矣。故家庭過失。惟以不聞爲主。功過格於妻妾。條記過。於子女。條記過。於婢僕。條又記過。蓋勘透家庭不睦之禍根也。凡樂聽婦僕言者。其亟猛省。○袁氏世範曰。女僕婢妾。每以言他人之短失。爲忠於主母。訶之則亦已矣。稍稍聽信。則必日造虛妄。使主母與人淡成讐隙。而彼始揚揚得意。自暱處於心腹也。非惟婢妾。雖僕隸亦然。主翁聽信。則戚族故舊皆失歡。而善良佃僕。反致譴責矣。◎一

譖愬不詳。察輒傾信之。

發而不中。另記過。發明沈龍江曰。凡僕從以膚受來愬者。

直笑曰。我不曾眼見有駕言毀罵主翁者。直笑曰。我不曾耳聞。則下人無所售其欺。而我亦不爲彼激怒。

以傷我天和。致有他事。蓋一忍之爲效多矣。○曹定菴公鄰有悍生。修先世怨。向其家僮極口肆詈。僮歸以告。公徐曰。人詈我而若述之。是重詈我也。處之恬淡。令人意消。○高忠憲家訓曰。人家有體面。崖岸之說。大害事。家人惹事。往往爲體面。立崖岸。曲護其短。力直其事。此乃自傷體面。自毀崖岸也。長小人之志。生不測之變。多由於此。○陳成卿曰。宦僕激怒其主。輒借壞體面三字。或碎其燈籠。或毀其水牌。以爲小人尊大。凌蔑家主。夫小民畏勢惜身。誰敢輒得罪宦家。主人若稍精明。此亦何難洞晰。

三過 性格乖戾。責怒屢加。使人難以承順。

一日三過。發

規任尚曰。君性嚴急。水清無大魚。察政不得下。和斯言真藥石也。凡臨下者。可無銘諸**附錄**袁了凡述其

姑夫沈心松多厚德而其姑袁夫人復以厚德佐之。謂生平未嘗疾言遽色。一日往候夫人。偶坐厨中。半晌見所行三事。不愧古人。時表兄有疾。姑親携好酒一碗置桌上。僕文成自外入。不知而覆之。姑詢其故。曰。我將謂宿茶耳。姑曰。汝不知原無過。今後凡事當仔細。千粒米難成一滴酒也。其人愧悔可掬。蓋耿耿數言嚴于捶楚。又有小童持盤盡覆厨下。其母自責之。姑望見急止之曰。此非故意。何必責之。但棄其碎者勿留。以傷人之足可也。一田保附舟問病。姑爲送舟金。且周日用復度所送二物加厚答之。語余曰。貧人問病大是好心。豈可令其折本。吁。片時所見皆中倫中慮如此。以此待人。終身豈有喜愠之色乎。自此見婢僕有不如意事。思及吾姑。輒怡然解愠。今二十一年無大怒矣。○司馬文正夫人張氏和柔敦實。自始

嫁至瞋目。未嘗有忿懣之容。亦未嘗有矯妄之言。御婢妾寬恕能容。嘗夜濯足。婢誤以沸湯沃之。足爲爛。病月餘方已。僅一批其頰而止。其沒也。自族姻至於斷養。無親疎大小。咸哭之極哀。仁慈之德。與袁夫人同。

◎容任瑣屑事指神自證。一次三過徵事富人張

往呼引神明。欲自表白。以後疾病傳染。數載之內。死喪殆盡。蓋容任呪罵。固所不可。然我亦不宜因小苛求。致彼不得不呼神自証。一家中。惟家主化之。張中之乖氣聚于一門者。實張中一人致之也。○又如姑蘇鄭灝事。凡爲家主者。可知所監焉。灝娶後妻。設席失一銀盃。張皇遍索。闔家欲自明心迹。列名書誓詞。投府城隍廟。灝止之不得。一日灝在家。恍若有皂持牌拉至城隍府。神厲聲問投狀之故。灝謝不知。神怒

曰汝憶失銀盃事乎此盃是汝孫盜去現質于東銀匠舖中今猶在架上如何誣罔他人致干擾官府灝再拜陳非已意神怒稍解曰姑放汝回與衆人說令他知道過因得甦醒時已半夜矣次早即到銀匠家訪之盃果在架上其孫所質也衆人聞而怖畏亟詣廟謝罪猶惴惴然彌月乃得自安

一過衣食不周勞苦疾病不恤

一日一過發明朱在菴曰良賤原無二格不過

貧人子女賣與富人遂名爲賤耳其實皆良也今人已子珍惜如珠義男女等土芥鞭撻已子膏粱肥甘義男女等粗惡饑餓已子羅帳裘衣義男女等飽蚊受凍已子畫閣雕床義男女等風栖濕處彼亦父母所生也何不公至是獨不思富者亦有貧時能保他日子女不爲人役乎○沈龍江曰吾答責僕婢則推

吾愛子女之心。吾婚嫁子女。則推彼爲父母之心。不甯惟是。卽寒暑饑飽疾病勞佚。與其心曲中微隱有疑慮而不敢聲言者。俱一一體悉之。而後得處下之道。○胡師蘇曰。人家尊卑大小。名分固自肅然。然中間情意。常宜和暢流通。如衣食居處禮儀疾苦等事。或中有所欲。口難直言。必須推心體恤。方可久。一家人如一株樹。爲根爲幹爲枝爲葉。大小固有不同。氣脉貫通則一。不然。必有枯槁之患矣。◎冤打

一下。

增補

有因使性而冤者。此粗暴之爲。無煩論矣。亦或有因誤認而冤者。君子未必能免。

附錄

程

子語錄云。鄭戩作縣。定民陳氏爲里正。旣暮。有姓陳人乞分居。戩立答之曰。安有朝定里正。而夕乞分居者。旣而察之。乞分居者。非定里正者也。夫赤子未能言。其志意嗜慾。母不能知。然不至誤認其意者。何也。

誠心愛敬而已。若使愛敬其民。如其赤子。何錯謬之有。○韓持國常患在下者多欺。明道先生曰。欺有三。有為利而欺。固可罪。有畏罪而欺者。在所恕。事有類欺者。在所察。夫惟能察而又加以誠心。則不冤矣。

◎惡罵一語。

發明宋仁宗嘗曰。朕未嘗罵人以死。即此便是至仁之主。

◎拂意時

遷怒。◎命使一事。不盡心教諭。迫切責成。

發明劉本孺先生性

方嚴。尤肅于閨門。而體人之情。未嘗不周。嘗曰。家衆造惡。皆由放蕩。必示以不可犯之法。至于臨事。詔之當先。語之當悉。勿以不言之喻。不戒之孚。望蚩蚩也。◎無心過失督責已甚

發明婢僕犯過。大都出于無心。輕則誠諭之。重則畧加扑責。儆其將來。或因一時忿怒。至于已甚。而不自

覺此非心之不仁。蓋由量之不廣也。謹錄古人之雅量者爲勗焉。○裴行儉宴蕃酋將士。出示瑪瑙盤二尺。文彩燦然。軍吏趨跌盤碎。惶懼叩首流血。行儉笑曰。爾非故也。色不少怍。○張瑩爲尚書。有事須急報。夜趣吏治文書。遲早朝奏書。初就。吏袖拂燭。覆于書。叩頭請死。公曰。誤耳。趣再書之。坐待怡然。竟夕不寐。○夏元吉天性寬平。嘗有從吏污所服金織。賜衣懼欲逃。公曰。污可浣。何懼爲。又有吏壞公所寶石硯。匿不敢見。公召吏諭曰。物皆有壞。吾亦何嘗惜。此也。慰遣之。又冬日出使至館。命館人烘襪。誤燒其一。館人懼不敢告。索襪正急。左右請罪。公笑曰。何不早白。并棄之而行。**廣義**白文無心兩字最好。即使其再四違命。不肯當心。亦限于庸鈍之質。未嘗爲有心也。惟夫偷竊搬唆。事最可惡。必難留者。竟宜遣之。若無大害。

姑加微懲。而總不可已甚。所謂已甚。其端有二。一則當其時而鞭撻過情。固宜戒矣。一則事已過而怒憾不已。尤宜戒焉。善乎袁氏世範謂既已鞭撻。當使令辭色如常。切勿怒之不釋。防其輕生自殘。愚因袁氏之說而更思所當戒者。凡婢僕犯過重大。宜卽斷決。切勿故張聲威。虛疑恫喝。令之憂惶無地。或因他事酬酢。鞭撻未加。而婢僕之短見。殊有不可測矣。

○飲食間遇有美有惡不均

共之擇美推惡。

發明

飲食間上下有異。亦恒情也。但

惡者自己亦須少嘗之。美者婢僕亦

須少分之。便覺禮別而情周矣。若惡者自己不一沾其味。美者又不令婢僕一沾其味。不特殘忍爲過。且亦不免失奴婢忠愛之心。安望一家施于有政乎。甚矣細微之處。皆不可忽也。

附錄

陰鏗與賓客飲。見行

觴者舉酒炙授之衆坐皆笑。鏗曰：吾儕終日酣飲而執爵者不知其味非人情也。侯景之亂，鏗爲賊擒，或救之得免。卽前所行觴者。○周武帝微時事，漢隱帝爲孔目官，見一小軍，跣足于雪中行，憫之，脫已靴賜焉。後帝奉命征契丹，在軍中幾危，得一小軍救之，乃賜靴之人也。○爲自己過求逸

樂令婢僕任一艱苦罔恤

發明 婢僕任艱苦。又其常情。然爲自己過求逸樂。致

家人任艱苦。獨不念聖人已所勿欲。勿施於人之訓乎。**徵事** 朱卓月稱其先大父榮祿大夫年雖老。溺器不假手僮僕。曰：何得以污穢累人。卽此一節。何如其盛德也。享高壽。易簀時沐浴竟。自着衣冠受子孫拜。蘇乃言曰：不願金玉重重富。但願兒孫箇箇賢。更無一語遂逝。○楊誠齋夫人年七十餘。每冬月黎明。卽

起詣厨下躬作粥。召臧獲女使徧食之。子東山啓曰：天寒何自苦如此？夫人曰：奴婢亦人子也。清晨寒冷，須使其腹中有火氣，乃堪役使耳。東山曰：是賤事，夫人老而親之，無乃逆施乎？夫人怒曰：若言如此，其必不遠矣。賤物貴我，勞人自逸，天道所不佑也。東山守吳興，夫人于郡圃種芋，躬紡績爲衣，時年八十矣。累受誥封，享高壽，終身無疾。辭世日，恍若有旗旛鼓吹迎之者。**附錄**魏辛毗從文帝射雉，帝曰：樂哉！毗曰：於陛下甚樂於羣下，甚苦帝後，爲稀出。○唐一菴與衆友夜話，將寢，問曰：此時還有事須料理否？衆曰：無一菴曰：夜寒，吾輩飲酒甚樂，從者尚未有寢宿處焉，得不與料理？陳仲醇曰：昔官人夜飲溫室，語人曰：今冬溫煖若是，時令不正也。從者于門外頓足曰：外間時令却甚正，處富貴而能念人饑寒勞苦者，蓋鮮。一菴

先生真可法也。

附家僕事家主

總論

爲人僕猶夫人也。一時名分豈

足爲羞。然往往以卑賤自居。若謂必

無榮貴之理。遂自輕忽。無所不爲。不知果報之理。不以卑賤而無驗也。問人之心。誰不欲壽算延長乎。誰不欲平居康健乎。誰不欲遇難得免乎。誰不欲臨終無疾乎。誰不欲衣食無缺乎。誰不欲子孫賢能乎。誰不欲來世富貴乎。誰不欲名登僊籍乎。苟其無是心也。則亦已矣。是心而與人無異也。則何獨所爲之事。而不肯與人同乎。若能受持是格。先以至誠之心事主。次以至誠之心與人。凡夫父母兄弟夫妻子女。存心動念。處事出言。一一奉行。不苟行之數年。不怠其所願者。必皆如其所願。卽

其所不敢願者。亦嘗有於意外獲之。天之報人。固歷歷不爽者也。○漢李善字次孫。南陽李元之僕也。元家疫死。只餘一孫名續。尚在襁褓。其家巨富。諸奴欲分其產。謀共殺之。善乃密負李續。逃匿山中。哺食乳。自生汁。至續十餘歲。乃出告于縣令鍾離意。意捕諸奴悉殺之。而立續。光武拜善及續俱爲太子舍人。遷日南守。道經滄陽。至元塚一里外。卽脫朝服。持鋤去艸。拜墓哭甚哀。自執爨以祭。曰。主君夫人善在此數日乃去。任滿遷九江太守。後入少室。得成上仙。黃見侯曰。主僕者。一家之君臣也。然自古以來。忠臣多。義僕少。豈盡爲僕者之莫肯好義乎。蓋君之待臣。顯其門戶。榮其身家。恩寵無窮。宜其厚報之也。至於奴僕。不過得幾金之身價。遂至陷爲微賤。其情亦可哀矣。且旣服役後。任

勞苦而罔恤。遇疾病而不知。分則君臣。情如路人。雖有至性者。亦安從興其感報之念乎。雖然。我欲積德求福。則何論主之惠。吾與否也。同一報而加于惠之淺者。其報爲常情。加于惠之淺者。其報爲至念。以至念與常情較。可以加倍記善。故惟盡我心。以積我德而已。我德旣盛。我福自增。昔甯越問其友以學成之期。友曰。必三十年。越曰。吾晝夜兼至。十五年足矣。然則事薄恩之主。正我之易於增福者也。艱苦于一時。受享在日後。有志者固宜奮然自勉矣。李元之待善。未知何如。若善之待其主。則尤不易得。處危疑之際。隻身獨處。密撫主孤。十餘年。不至爲諸奴所蹤跡。其志量智識。較之諸葛孔明。霍子孟之輔幼主。事爲更難。孰謂廝養中無大聖賢哉。願世之視奴僕者。勿以輕人。願世之身。

爲奴僕者。勿以自棄。○錢益少時。其主以謀田。不遂。令益以稗子撒彼田中。益謂妻曰。撒則荒人之田。不撒則逆主命。乃蒸熟稗子而後撒之。主密使人偵視。見已撒矣。後益生子美。中登進士。隨任受封。享高壽。嗟乎。錢翁非欺主也。蓋其主而忍爲此事。必暴虐性成。非可以言論者也。無已。必辭而不爲。而爲之者仍有人。則僅以全已之功。無以免主之過。于心終有所不忍。不若以身任之。俾之兩全無害。外不悖理。內不悖主。若錢翁之事其主。真可謂合乎情。中乎禮義者矣。卒也身受誥封。廁縉紳之列。世謂爲僕者必無榮貴。不幾於所見之淺乎。○青陽吳六房僕人吳毛。持戒力善。左兵渡江。合家避去。吳毛獨代主看守家產。被賊七鎗而死。其弟來看。毛復醒曰。我夙業當受豬身七次。因齊戒。

力以七鎗散冤從此徑往西方矣。後其主恍惚見之。前後旛幢向其主曲身作揖曰。我吳毛也。緣朝天過此。言訖不見。主爲畫像以供禮焉。呂讓曰。按佛經爲人奴婢。由前世不修來。則知同焉爲人。不幸而處於卑下。已非天之所以厚待我也。乃竟以卑下自居。而不復有自好之意。夫安知此後之所以待我者。更何如耶。惜其無有以吳君之事提醒之也。世若吳君之持戒力善。蓋難其人。若吳君之持戒力善。而終也爲賊所殺。則世益以藉口。而莫肯於爲善。豈知吳君之孽。如彼其深。吳君之報。如此其厚乎。使其竟死。世何從知。幸也。明告於弟。顯形於主。舉世因其傳焉。而凡不幸而處於卑下者。可以奮然興矣。○明朝有阿寄其人者。田叔不爲作阿寄傳。止稱述其爲人。而莫徵其獲報。吾知阿

寄死後。當必有同於吳毛之不徒死者也。就其行事。則誠賢人君子之所難矣。謹節錄其傳。爲天下勸焉。阿寄。涪安徐氏僕也。徐氏兄弟析產。伯一馬。仲一牛。季寡婦得阿寄。寄年五十餘矣。寡婦泣曰。馬可乘。牛可耕。踉蹌老僕。徒費我藜羹。寄歎曰。主謂我不如牛馬耶。乃爲畫策營生。寡婦悉簪珥得十二金。寄入山販漆。期年而三其息。又二十年。致產數萬金。爲寡婦嫁三女。婚兩郎。齊聘皆千金。又延師教兩郎。旣皆輸粟爲入太學。而寡婦則阜然財雄一邑矣。頃之病且死。謂寡婦曰。老奴馬牛之報盡矣。出篋中二楮。家計巨細悉載。曰。以此遺兩郎君。可世守也。言訖而終。或疑寄私蓄者。竊啓其篋。無寸絲粒粟之儲焉。一姬一兒。僅敝縕掩體而已。嗚呼。寄村鄙之民。衰邁之叟。非素聞詩禮之風。

心激寵榮之慕也。乃肯畢心殫力。昌振鉉基。公爾忘私。斃而後已。是豈尋常所可及哉。抑寄年已老矣。見徐氏之族。雖幼必拜。見主母不睨視。女使雖幼。非傳言。雖亡也。若然。卽縉紳讀書明理達義者。何以加諸。

一功

贊成一小善。

若贊成大善。照格中條例。准十分之一記功。

○勸主爲善。

一言一功。若能令主見從。與自爲同。照事記功。

○對主和氣婉容。順意承旨。

主常喜悅。

一日一功。一月不怠。另加十功。不厭主貧。忠勤不貳者。加倍論。

○主疾小

心服侍。無厭倦心。

一日一功。半月不怠。另加十功。

○爲主用財公平。

出入不侵漁。不尅減。

用錢五百。准一功。

◎不在主家服役。見

主貧困。出財供給。

費百錢一功。若身任勞苦。節損自家衣食之費。以給主者。加十倍。

◎聞人談主過失。善爲掩護。

一事一功。

◎爲主營運生息。

能無損主德者。百錢一功。

◎家主教導。小心順從。

一事一功。

◎見同伴

有背主者。委曲勸化。

一言一功能勸轉者。加三十倍。

◎每事隨力自

盡。不推委同輩。

一日一功。

◎同伴有疾。小心伺察。

一日一功。

◎

一難事。已不能爲。同輩任之。抱不安念。

一念一功。

◎掩一

同輩小過。

五功 得家主親戚間相責怒語不輕傳述。一事五功。◎遇掃

墓節。不忘亡主。計所費論功外。另加五功。

十功 受主鞭笞怒罵及服役勞苦。無怨望心。一事十功。極難忍處。

無怨加五倍論。

二十功 不倚主勢。侵凌小民。一年二十功。

三十功 見主有失。能委曲勸止。

五十功 葬一亡主不得葬柩。至誠盡心力。論錢記功外。另加五十功。

◎一心事主。不欺不肆。經一年五十功。增註前於條例中詳分之。就事言也。此於

一年後總計之。就心言也。

百功 終身不談主過失。謂不向人言。◎見惡於主。能積誠感

動。◎見最幼主。必盡誠敬。◎見家主親戚交遊。敬慎

不失禮。

千功 盡敬盡愛。終身心念不欺。隨職自效。若扶持幼主。起家成立。終

身不染絲毫者。加倍。

千過富而不顧主困窮。

三百過傳述是非離間主家骨肉。

增註謂兩邊傳述。蹙起風波。小人不達。往

往有然。若故意交構其間。此巨惡所為。千過猶未盡其罪也。

百過見主失勢。又圖轉事。○誘引幼主逸欲敗度。

五十過揚主一隱惡。

私談家主。閨闈者全。

二十過見主有大過。不善巧勸化。

若其主酷虐性成。畏懼不言者免。

十過

挑誘同伴不忠於主。

一言十過。

◎一難事巧心推諉同

輩。

◎播弄是非。侵凌同輩。

一事十過。

三過

出語唐突家主。◎背後談主一過失。

一過

唆主一小惡事。

大事與自為者同論。

◎阻主一小善事。

大事照主

所欲為之善。准過。

◎見同伴不忠於主。不婉勸。

增註勸之功甚重。而不勸

之過甚輕者。蓋其所不忠之端。本極細微。漫不為勸。人情間或有之。倘見有意賣主及交構是非等類。而不勸者。應加二十倍。◎不甘服役。生心離主。一念一過。若出怨言。一言一過。倘其

主酷虐難親不得已而思去主者免然亦不可出怨言。

◎在家主前出言不和

婉◎欺侮最幼主

一言一事俱准一過

◎剋主財

百錢一過主家貧者倍論

◎一事教導不留心◎無事嬉遊致主責怒◎一同

伴事可為不為當前規避◎同伴小忿不耐在家主

前爭執

家主勸誡不止者加五倍

◎竊主一微物

致誤疑同伴指神呪罵者加二

十倍◎為主騙詐人財物

二百錢一過私得者百錢一過

